

Na osnovu člana 17. Zakona o Vladi Unsko-sanskog kantona (“Službeni list Unsko-sanskog kantona”, br.2/97, “Službeni glasnik Unsko-sanskog kantona”, br.3/2000, 5/2000, 3/2003 i 20/2004), a u vezi sa članom 4. Poslovnika o radu Vlade Unsko-sanskog kantona («Službeni list Unsko-sanskog kantona», broj 4/97), Vlada Unsko-sanskog kantona na sjednici održanoj dana 14.02.2008.godine, d o n o s i:

PROGRAM VLADE UNSKO - SANSKOG KANTONA ZA 2008. GODINU

UVOD

Početak rada Vlade Unsko-sanskog kantona u mandatnom periodu 2007-2010. godine, karakterišu složeni uslovi rada zbog ukupnog stanja društveno-ekonomskih i političkih odnosa u Bosni i Hercegovini, koja prolazi kroz period preispitivanje unutrašnje organizacije i ustavnog sistema, što je zahtjevan i složen proces koji će se reflektirati na sve oblasti života i rada.

Vlada Unsko-sanskog kantona imenovana je sa zakašnjenjem od 7 mjeseci poslije izbora koji su održani u oktobru 2006.godine, tj. 11.05.2007.godine, sa stanjem na Kantonu koje je karakteriziralo postojanje i sadejstvo većeg broja nepovoljnih uslova života i rada o kojima nije postojao koncezus o načinu njihovog rješavanja. Tu se naročito ističu problemi privredne nerazvijenosti, nezaposlenosti, siromaštva, ekonomske i socijalne nesigurnosti, što se odražava na ukupno političko stanje i društveno ekonomske odnose. Nužno je istaći da je zbog kašnjenja u implementaciji izbornih rezultata ova Vlada zatekla veliki broj zaostalih obaveza iz ranijeg perioda koje je bilo nužno izvršiti bilo zbog zakonskih obaveza bilo zbog obaveza prema Skupštini Unsko-sanskog kantona. Takvo stanje stvari nije dalo mogućnost Vladi da u potpunosti razvije svoj strateški i godišnji program u 2007.godini, već su ministarstva i Vlada radili pod uslovima pritiska izvršenja zaostalih obaveza iz prethodnog perioda, izvršavanja tekućih obaveza i reagiranja na pojave i probleme koje su nametale okolnosti intenzivnih društveno-ekonomskih odnosa u različitim sferama života na Unsko-sanskom kantonu. Sedmomjesečni rad Vlade u 2007. godini bio je, pored navedenih razloga, opterećen i složenim političkim odnosima u Unsko-sanskom kantonu koji su se prelamali u radu Skupštine Unsko-sanskog kantona i imali negativne uticaje na rad Vlade. U takvim složenim uslovima Vlada Unsko-sanskog kantona imala je težak zadatak da definiše osnove strategije svoga rada u okviru koje bi utvrdilo ciljeve i pravce svojih aktivnosti koje treba da osiguraju kontrolu i prevladavanje negativnih uslova i trendova, te iznađe motivaciju i ukaže na bolju perspektivu građanima i drugim subjektima života i rada na području ovog Kantona.

Ova Vlada ocjenjuje da postoje neiskorišteni ljudski, prirodni i ekonomski resursi za snažan zaokret u pravcu prevladavanja sadašnjeg stanja, problema i slabosti ukupnog života i rada na području ovog Kantona, te da aktivnosti Vlade i svih drugih subjekata u budućem periodu treba da idu ka aktiviranju i promociji tih prednosti i mogućnosti uz samopouzdanje, ozbiljnost i odgovornost u planiranju i provođenju strateških i operativnih aktivnosti. Podrška svih subjekata političkog života na području Unsko-sanskog kantona će biti nezamjenjiv uslov za ostvarivanje ideja i ciljeva strategije rada Vlade Kantona. U projekciji i realizaciji strategije svog djelovanja Vlada Kantona će usmjeriti svoje aktivnosti ka zauzimanju značajnijeg mjesta i većem učešću projekata sa našeg kantona u Budžetu Federacije BiH i u drugim izvorima finansiranja sa viših nivoa vlasti. Ovaj Program u svojoj sistematici i sadržaju, pored uobičajenih, metodološki propisanih elemenata, koji se odnose na programske aktivnosti Vlade i kantonalnih ministarstava i drugih tijela kantonalne uprave te njihovog operativnog plana u normativnom i analitičko-informativnom dijelu, sadrži i pet prioriteta Vlade Kantona, koji će predstavljati težište aktivnosti i najvažnije ciljeve u radu Vlade u 2008. godini.

Osim toga, u okviru programskih aktivnosti Vlade i ministarstava sadržane su i one aktivnosti koje će Vlada i ministarstva otpočeti u 2008. godini, ali realno ih nije moguće ostvariti u toj godini zbog dužine, procedura ili vezanosti za aktivnosti viših nivoa vlasti, a radi se o aktivnostima od izuzetnog značaja za građane Kantona.

Iz svih navedenih razloga Program rada Vlade Unsko-sanskog kantona za 2008. godinu predstavlja prvi programski dokument Vlade u ovom sastavu, koji ima cilj da se rad i aktivnosti Vlade uokvire u jasne strateške i operativne odrednice projicirane prema Ustavnim i zakonskim obavezama, te očekivanim i pretpostavljenim društveno-ekonomskim i političkim odnosima.

2. PET PRIORITETA VLADE UNSKO-SANSKOG KANTONA

Ova Vlada, prihvatajući se ove zahtjevne i odgovorne dužnosti, od prvog dana je jasnog opredjeljenja da u mandatnom periodu, svoje ključne resurse najdirektnije usmjeri na plansko poboljšanje uslova života i rada svih građana Kantona.

Program rada ove Vlade u svojoj suštini ima samo jedan cilj: da građanima ovog Kantona bude bolje. Taj cilj se ne može realizirati bez saradnje svih segmenata vlasti i civilnog društva. Niko drugi osim nas niti je pozvan niti će rješavati naše probleme. Od nas se očekuje da popravimo i gradimo bolje uslove i kvalitetniji standard svih građana u svim oblastima života i rada, a ono što nije dobro za građane, nije dobro ni za Vladu ni za Skupštinu USK-a.

Vlada i Skupština Kantona zajedno nose tu odgovornost i razumljivo da će Vlada kreirati, predlagati i izvršavati politiku rada i razvoja kroz programe, zakone, odluke i druge dokumente, a Skupština je ta koja će utvrđivati tu politiku, donositi dokumente i u toku tog procesa inicijativa i podrška Skupštine i njenih tijela su ne samo pravo nego i obaveza poslanika. Naši problemi su zajednički problemi i naša obaveza je da ih zajedno i rješavamo. A Vlada je svjesna i svoje uloge i svoje odgovornosti na tom putu, problemi su na svim nivoima, pa tako i na ovo kantonu raspoređeni po resorima u Vladi. Ali to nikako ne znači da je bilo ko u Vladi oslobođen odgovornosti za ukupno stanje Kantona. Vlada kao tim nosi ukupnu odgovornost, a onda i resorni ministri, kao rukovodioci organa uprave koji imaju odgovornost za ukupno stanje i poboljšanje tog stanja u oblastima svojih resora.

Obzirom na sadašnje stanje u svim sferama društvenog života Kantona, naš rad i aktivnosti će biti posebno usmjerene na slijedećih:

P e t p r i o r i t e t a

1. Strateški projekti za snažno i planirano privredno jačanje USK-a

Ova Vlada ima za cilj da u strateškim planiranjima i projektima, Kanton posmatra kao jednu cjelinu. Na taj način, i sa takve pozicije razmišljanja i planiranja, opredijelit ćemo se za one oblasti i one projekte koji Kantonu kao cjelini donose i sada i dugoročno najviše koristi na planu ukupnog privrednog jačanja. Kao jedan od načina je i formiranja ekonomske regije Una – Sana /ERUS/, ili Bihaćke regije, ali ne samo na papiru. To mora biti na način da se Kanton prema potencijalnim investitorima, drugim evropskim regijama kao i fondovima evropske unije pojavljuje kao jedna regionalna ekonomska cjelina sa precizno definiranim programima i projektima koje kandidira, i resursima kojima raspolaže, nudi i prezentira.

U tom smislu ova Vlada za cilj ima uložiti maksimalan napor, u saradnji sa višim nivoima vlasti, na projektima koji su zasigurno od regionalnog značaja kao što su: izgradnja magistralne nove ceste Bihać-granica R.Hrvatske, magistralne nove ceste Bihać-Bosanska Krupa

preko Srbijanskog platoa, magistralne brze ceste Bihać-Ključ, izgradnja magistralnog pravca Kamenica-Bosovac-Miholjevac radi izravnijeg povezivanja graničnog prijelaza Izačić i sjeveroistoka Unsko-sanskog kantona, nastavak izgradnje obilaznice V. Kladuše, izgradnja obilaznice Cazin i Ključ, istraživanje nalazišta gipsa u Kulen Vakufu, iskorištavanje alternativnih izvora energije, izrada potrebnih studija za gasifikaciju Kantona i dr.

Realizacijom ovih i sličnih projekata naš Kanton treba da krene pravcem razvoja i zauzimanja pozicije u Federaciji i državi BiH koju i zaslužuje.

2. Obrazovanje

Obrazovanje, koje vidimo kao izuzetno važan segment društva, će kao takvo imati posebnu pažnju ove Vlade, kroz sve oblike djelovanja. Kroz ovu oblast se u većoj ili manjoj mjeri prelamaju gotovo sve druge oblasti našeg djelovanja.

Obrazovanje i danas zauzima veliki dio i budžeta i naših aktivnosti.

- Budžet obrazovanja (od predškolskog do visokoškolskog) u 2006. godini iznosio je 60 mil. KM, u 2007. godini 67,5 mil. KM, a u 2008. godini plan je 90,5 mil. KM.
- Za rekonstrukciju i izgradnju osnovnih i srednjih škola je u 2006. godini izdvojeno je 1,8 mil. KM, u 2007. godini 3,3 mil. KM, a u 2008. godini plan je 3,5 mil. KM.

Ove godine planiramo završiti i višegodišnje projekte oko izgradnje nove zgrade Gimnazije u Cazinu, nove zgrade Visoke zdravstvene škole i potpune rekonstrukcije zgrade Gimnazije u Bihaću. Ukupna vrijednost navedena 3 kantonalna projekta prelazi 6 mil. KM.

Ova Vlada je jasno opredjeljena da, izdvajanja za obrazovanje i nauku ne budu, kao što se do sada tretiralo «trošak» društva. Krajnje je vrijeme da, poučeni iskustvima evropskih društava, ulaganja u nauku i obrazovanje posmatramo kao izuzetno važnu investiciju. Obrazovanje i nauka je jedna od najvažnijih investicija jednog društva. Naša zajednička obaveza je da počnemo misliti i što je važnije, raditi na taj način. Zbog toga je poseban akcenat ove Vlade na strateškom organiziranju, održanju i razvoju Univerziteta kao vrhunske obrazovne, naučne i razvojne institucije. Nije dovoljno samo donijeti zakon po kome se daje pravo mladima da upišu neki fakultet. Oni to pravo imaju i bez Univerziteta u Bihaću. Ali ogromna većina nema nikakve mogućnosti da koristi to pravo u Sarajevu, Mostaru, Zenici ili Tuzli. Ova Vlada ima za cilj obezbijediti i mogućnosti za kvalitetan studij na Univerzitetu u Bihaću.

Trenutno, naš Univerzitet nema uopće svoga prostora. Veliki je deficit u «domaćem» stručnom naučno-nastavnom kadru. Samim time su mogućnosti za kvalitetan studij izrazito umanjene. Univerzitet mora postati realni nosilac naučnog rada i projekata koji će biti temelj razvoja Kantona. Budžet Univerziteta u 2006. godini iznosio je 6,5 mil. KM, u 2007. godini 9,9 mil. KM, a u 2008. godini plan je 12,09 mil. KM. Upravo ova Vlada ima za cilj značajne promjene u pozitivnom smislu upravo na ovim pitanjima. Naše je uvjerenje da je investicija u nauku i obrazovanje – najbolja investicija za našu budućnost.

Na isti način će ova Vlada posvetiti pažnju i ostalim nivoima obrazovanja. Jer svako dijete, u svakom gradu i u svakom selu, ima pravo na kvalitetnog učitelja, na čistu i toplu učionicu, na savremena sredstva za učenje, na fiskulturnu salu, na prijevoz do škole i tako dalje. Naša je obaveza da to omogućimo. Isto tako, podržat ćemo sve projekte iz oblasti odgoja, kulture i sporta. A važan detalj u svemu ovome je posvetiti pažnju i materijalnom položaju naših učitelja, nastavnika i profesora. Uz realizaciju mjera koje su predložene u ovom Programu mi možemo kazati da idemo u tom pravcu.

3. Zdravstvena zaštita

Kad je u pitanju ovaj segment našeg društvenog života, ova Vlada je opredjeljena da zdravstvena zaštita mora biti podignuta na jedan daleko viši nivo, i dostupna svim građanima bez obzira na kojem dijelu Kantona oni živjeli.

U zdravstvene ustanove na području Kantona u toku prošle godine direktno je uloženo 3,1 mil. KM. Budžet Zavoda za zdravstveno osiguranje je 63,7 mil. KM, a cilj ove Vlade je da naši građani konačno počnu osjećati ova ulaganja. Niz mjera je predloženo u ovoj oblasti koje će to i omogućiti. Ali ova Vlade ima za cilj napraviti i bitno kvalitetniji iskorak na ovom polju. Pored stalnog jačanja domova zdravlja, kroz materijalno-tehničku i kadrovsku opremljenost, taj iskorak je prije svega vezan za tri važna projekta iz ove oblasti u Kantonalnoj bolnici „Dr. Irfan Ljubijankić“, Lječilištu Gata i Bolnici u Sanskom Mostu. Ovaj Kanton i građani Kantona, troše ogromna sredstva na liječenja i druge usluge iz ove oblasti van Kantona.

Cilj ove Vlade je da u skladu sa medicinskom i ekonomskom opravdanošću razvija slijedeće kapacitete:

- Kantonalnu bolnicu „Dr. Irfan Ljubijankić“ izgraditi u moderan medicinski centar koji može kvalitetno i u najvećoj mjeri zadovoljiti potrebe građana u oblasti sekundarne i tercijarne zdravstvene zaštite,
- Omogućiti kvalitetan rad nove bolnice u Sanskom Mostu, koja će početi sa radom u prvoj polovini 2008. godine i
- Osposobiti centar Gatu da može zadovoljiti sve usluge banjškog lječilišta naših građana.

S druge strane naši građani imaju pravo da konačno znaju šta i u kojoj mjeri, od zdravstvenih usluga pokriva njihovo osiguranje, i kolike su to cijene zdravstvenih usluga za koje se naplaćuje «participacija» i zašto je učešće osiguranika u finansiranju tih usluga nužno.

Naša je realnost da, u većini slučajeva stanje po domovima zdravlja, stanje u Kantonalnoj bolnici, od odnosa prema građanima do uslova rada i boravka, zahtjeva hitne mjere. U mnogi slučajevima, stanje je nezadovoljavajuće i neprihvatljivo.

4. Investicije u privredi i infrastrukturi

U putnu infrastrukturu Kantona Vlada godišnje se prosječno izdvaja od 7-8 mil. KM, bez učešća sredstava sa nivoa Federacije koja se kreću od 1,5-2 mil. KM. Sve to nije dovoljno da u značajnijem i kvalitetnijem obimu popravi stanje u ovoj oblasti. Mi na području Kantona nemamo u potpunoj funkciji željeznički saobraćaj na čemu ćemo se zalagati zajedno sa federalnim organima, a trenutno ne postoji niti jedan civilni aerodrom koji pruža usluge putničkog i teretnog zračnog saobraćaja. U isto vrijeme, mi smo svjesni da to itekako utječe na stanje u oblasti privrede, kao i turizma koji zbog svojih prirodnih pretpostavki i značajnih potencijala treba da zauzme jedno od najznačajnijih pozicija u razvoju Kantona.

Po svemu tome mi kao Kanton nismo previše privlačni investitorima, za razliku od nekih drugih. To je naša realnost. Ali je isto tako naše realnost da imamo resurse koje još uvijek ne koristimo u cilju osmišljenog i planiranog privlačenja investicija. Ono što moramo promijeniti kod sebe jeste način na koji se odnosimo prema resursima. Ova Vlada će posebnu pažnju posvetiti osmišljenom predstavljanju resursa Kantona kroz konkretne projekte koji se mogu nuditi potencijalnim investitorima, naročito onima iz inostranstva.

U cilju popravljavanja ekonomske slike Kantona od posebne je važnosti obezbjediti direktne investicije. Smatramo da je naša zajednička obaveza u ovom mandatu, da osiguramo projekte i uvjete za vandbudžetske investicije u vrijednosti, prosječno na godišnjem nivou od 15 do 20 mil. KM. Vlada će posvetiti maksimalnu pažnju osmišljavanju i izradi takvih projekata koji bitno doprinose poboljšanju poslovnog ambijenta na Kantonu, ali i podižu kvalitet našeg života.

Na žalost, naša ukupna ekonomsko-socijalna slika bi danas bila puno bolja da smo imali, ili da imamo više konkretnih projekata. Ovaj Program Vlade je i javni poziv svim općinama, institucijama i svima nama, da pravimo i kandidiramo projekte koji će popravljati ovu sliku.

Veliki korak na tom putu je posao urađen prošle godine po pitanju rudnika gipsa u Kulen Vakufu. To je naš zajednički uspjeh, koji će u budućnosti dovesti do novih investicija, otvaranja novih radnih mjesta i privrednog razvoja.

U 2006. godini iz budžeta Unsko-sanskog kantona općinama su doznačena sredstva u iznosu od 2,6 mil. KM, u 2007. godini 9,0 mil. KM, a plan za 2008. godinu je 9,0 mil. KM. Niko ne može biti oslobođen odgovornosti ako nema projekata. Ova Vlada traži konkretne projekte od općina. Vlada će biti odgovorna ako ne podrži realizaciju kvalitetnih projekata.

5. Privreda i zapošljavanje

Privreda i zapošljavanje su prvi prioritet u svim projektima vlasti.

Naš cilj je, nizom mjera i projekata, smanjiti stopu nezaposlenosti na Kantonu, jer bez privrednog razvoja nema ni kvalitetnog programa za povećanje zaposlenosti koji namjeravamo donijeti. Nema drugog način za popravljavanje ove slike osim otvaranja novih proizvodnih radnih mjesta u privredi, a na tom putu obaveza nam je da stalno i uporno radimo, te da pomognemo privrednim subjektima na području našeg kantona. To je obaveza i Vlade i Skupštine.

Jedan od načina je, a to ova Vlada i radi, subvencije i podsticaji u poljoprivredi. Otvaranje novih radnih mjesta u poljoprivrednom sektoru i na vlastitim poljoprivrednim gazdinstvima kroz njihovo povećanje i rekonstrukciju, čemu će svakako pomoći projekat IFAD IV (Međunarodni fond za razvoj poljoprivrede) koji će se implementirati u periodu od 2008-2011. godine, a naš Kanton planira realizaciju od 8-9 mil. KM za razvoj lokalne infrastrukture, te kreditiranja malih i srednjih preduzeća i fizičkih lica u ovom sektoru. Također, Vlada FBiH je u budžetu za 2008. godinu planirala 52,65 mil. KM za novčane podrške u poljoprivredi, a poljoprivrednici sa našeg kantona trebali bi da participiraju u ovim sredstvima sa iznosom od 5,5 mil. KM direktnih podrški, te oko 2 mil KM podrški u oblastima ruralnog razvoja i kapitalnih investicija. Stupanjem na snagu Zakona o novčanim podrškama u primarnoj poljoprivrednoj proizvodnji u 2008. godini iz Budžeta USK-a godišnje će se izdvajati minimalno 2% od iznosa ukupnih poreznih prihoda za poticaje u poljoprivredi. Naprijed navedeni planovi treba da dovedu do povećanja broja zaposlenih u 2008. godini, kao i da zadržimo mjesto najvećeg proizvođača mlijeka u Federaciji BiH, drugo mjesto u proizvodnji junećeg mesa, a u povrtlarskoj proizvodnji ostvarimo značajniji rast proizvodnje jagodičastog voća.

Isto tako ćemo kroz poticaje preduzećima u privredi podržati njihova ulaganja u nove tehnologije i standarde koji osiguravaju veću i kvalitetniju proizvodnju i izvoz. U budžetu kantona za 2008. godinu planirana su sredstva u iznosu od 1,0 mil. KM za podsticaje obrtu i poduzetništvu, sa nivoa FBiH očekujemo za ove namjene oko 800.000,00 KM, a također plan je i aktivirati sredstva od privatizacije kod Uni-Credit Zagrebačke Banke. Planiramo i niz drugih mjera u toj oblasti.

Nezavršen proces privatizacije je naš zajednički ogroman problem. U tom smislu: u što skorijem roku završiti proces privatizacije. Uložiti maksimum napora da se preostalim preduzećima i privrednim subjektima obezbijedi kvalitetna privatizacija.

Moramo biti svjesni da postoje veliki neiskorišteni potencijali ovog Kantona kad je u pitanju otvaranje novih proizvodnih radnih mjesta. Naši resursi su slabo ili nikako iskorišteni. Mnogi segmenti iz ove oblasti, kao što je ekološka poljoprivredna proizvodnja, pčelarstvo, su apsolutno neiskorišteni. Naša prednost može biti obrazovana i stručna radna snaga kojom raspolazemo u mnogim segmentima privređivanja, a moramo jačati menadžment struktura u privredi čiji nedostatak i potreba se osjeća.

S toga smo, kao što se vidi iz ovog Programa, nizom mjera u oblasti privrede i poljoprivrede, predvidjeli značajne pomake na tom planu. Ono što će najviše biti potrebno ovoj Vladi u ovoj godini, jeste povjerenje i podrška Skupštine.

3. PROGRAMSKE AKTIVNOSTI KANTONALNIH MINISTARSTAVA I DRUGIH TIJELA KANTONALNE UPRAVE

Vlada Unsko-sanskog kantona, polazeći od svojih nadležnosti, a u vezi sa ovlaštenjima koja Kanton ima u svom djelokrugu prema Ustavu Federacije Bosne i Hercegovine i Ustavu Unsko-sanskog kantona, u 2008. godini usmjerit će svoje aktivnosti na:

- rješavanju sadašnjeg teškog stanja u ekonomiji na području Unsko-sanskog kantona kroz dovršetak procesa privatizacije i otvaranje Kantona za direktne strane investicije;
- stvaranju ambijenta za što veće zapošljavanje nezaposlenih osoba i s tim u vezi razrješavanje teškog stanja u oblasti zapošljavanja, rada i socijalnih problema;
- razrješenu problema opterećenja Budžeta i javne potrošnje unutrašnjim dugovima, naročito u vezi sa obavezama po tužbama i presudama po tužbama zaposlenih kod budžetskih korisnika i s tim u vezi brojnim sudskim izvršenjima;
- zaštiti i pomoći porodicama šehida i poginulih boraca, ratnih vojnih invalida, invalida civilne žrtava rata, starih i iznemoglih osoba i ostalih u stanju socijalne potrebe;
- pomoći u održanju i razvoju Univerziteta u Bihaću i svih drugih organizacija i oblika obrazovanja u pravcu postizanja propisanih standarda i potreba u obrazovanju i razvoju Kantona;
- značajnijoj participaciji Unsko-sanskog kantona u projektima, fondovima i budžetima Federacije Bosne i Hercegovine i Bosne i Hercegovine koji su od značaja ili mogu biti od značaja za naš Kanton;
- jačanju i provođenju ljudskih prava, vladavine prava, građanskih i vjerskih sloboda, jednakosti i ravnopravnosti naroda i suzbijanje diskriminacije po bilo kom osnovu;
- jačanju državnih institucija kroz reformu uprave i njenu potpunu depolitizaciju, usvajanje najviših standarda organizacije uprave, stručno osposobljavanje državnih službenika i namještenika, potpuna informatizacija rada Vlade, kantonalnih ministarstava i ostalih tijela uprave;
- jačanju mehanizama za borbu protiv korupcije i organiziranog kriminala;
- jačanju mehanizama koji garantuju sigurnost i zaštitu građanina i pojedinca i kroz doprinos reformi policije i drugih organa sigurnosti shodno obavezama koje Kanton bude imao po zakonima koji u tom smislu budu usvojeni na nivou države;

- snažnoj podršci pravosuđu u izgradnji njegove neovisnosti i kroz finansijsku i drugu podršku za stvaranje odgovarajućih uslova za rad sudova i tužilaštava;
- stvaranju prostora i uslova za veće uključivanje mladih u svim oblastima društvenog života, briga o njihovim interesima, potrebama i otvorenost prema njihovim potencijalima i idejama;
- planskom i organiziranom korištenje prirodnih i drugih resursa Kantona u cilju veće proizvodnje i zapošljavanja uz istovremeno osiguranje zaštite i očuvanja zdrave životne sredine;
- stvaranju boljih uslova života i rada na selu kroz intenziviranje poljoprivrede i drugih oblika proizvodnje, zanatstva i usluga, urbanizaciju, izgradnju infrastrukture i bolje povezanosti sa gradskim sredinama;
- jačanju zdravstvene zaštite stanovništva na osnovu strateškog pristupa i razvoja svih nivoa zdravstvene zaštite;
- pristupanju te intenzivnijoj saradnji na bilateralnom planu sa pojedinim evropskim regijama na bazi zajedničkih interesa u oblastima privrede, turizma, infrastrukture, obrazovanja, uprave i dr;
- organiziranju institucionalnog i drugih oblika povezivanja sa dijasporom sa područja našeg Kantona;
- podršci naučno-istraživačkom radu u vezi sa potrebama razvoja Kantona;
- donošenju prostorno-planske dokumentacije Kantona i njeno usaglašavanje sa realnim stanjem potreba, razvoja i očuvanja prirodne i životne sredine sa posebnim zaštićenim područjima kao što je „Nacionalni park Una“ i drugi prostori i prirodne znamenitosti od posebne vrijednosti i značaja;
- zaštiti kulturno-istorijskog nasljeđa kroz podršku institucijama, programima i projektima čiji rad, izradu i pokretanje će značajnije, direktno i kroz partnerstva, podržati;
- poticanju i obnovi dijaloga, suživota, međusobnog uvažavanja i tolerancije i prevazilaženja svih oblika podjela, netolerancije i nesnošljivosti na području Kantona, a u interesu zajedničkog života i prosperiteta;
- jasnom definisanju i uvezivanju prostora Kantona u infrastrukturne projekte i koridore iz oblasti saobraćaja, PTT veza, radio i TV signala i energetike, a u cilju osiguranja uključenosti i strateškog povezivanja te prevazilaženja moguće izolacije;
- poticanju i jačanju uticaja javnog mijenja, medijskog razvoja, stručnosti i pluralizma u medijima, medijske afirmacije Kantona i otvorenosti prema medijima i javnosti uopće.

3.1. KANTONALNO MINISTARSTVO FINANSIJA

Oblast finansija i budžeta je oblast u kojoj Vlada u mandatnom periodu ima za cilj da uvede programsko budžetiranje sa ciljem da se javna potrošnja predstavi i kontroliše kroz konkretne programe i aktivnosti u cilju definisanja mjerljivih zadataka i projekata koje treba izvršiti i osiguranja transparentnosti planiranja, trošenja i kontrole trošenja javnih prihoda, edukacije i discipline budžetskih i drugih korisnika javnih prihoda, sveobuhvatnog srednjoročnog planiranja budžeta i ukupno javnih prihoda i rashoda, a u cilju korištenja finansijskih sredstava za najviše ekonomske i socijalne ciljeve uz istovremeno osiguranje efikasnije naplate svih vrsta javnih prihoda, naročito onih koje dosad nisu izdašno realizirani. Nužno će se morati definisati ukupni unutrašnji dug na nivou Kantona i način izvršenja obaveza po tom osnovu, radi osiguranja stabilnosti finansijskog sistema, uz istovremeno osiguranje naplate dugova prema kantonu po osnovu koncesija, pozajmica, povrata imovine, šteta iz osnova neuspjelih privatizacija i drugih osnova. U realizaciji navedenih strateških ciljeva u oblasti finansija, ciljevi, poslovi i zadaci će se sastojati u slijedećem:

***Jačanju finansijske discipline**

Cilj je da se na osnovu usvojenih makroekonomskih i fiskalnih politika na nivou Države i entiteta obezbijedi odgovarajuća alokacija javnih prihoda neophodnih za funkcioniranje sektora koji su u nadležnosti kantona i to:

- efikasnijim mehanizmom naplate javnih prihoda putem kantonalne uprave za inspeksijske poslove i porezne uprave,
- odgovornijim pristupom resornih ministarstava za potpuno i pravovremeno prikupljanje neporeznih prihoda,
- izmjenama i dopunama postojećih zakona o administrativnim i sudskim taksama i donošenjem Zakona o komunalnim taksama

***Jačanju upravljanja javnim finansijama**

- usmjeravanje dostupnih finansijskih sredstava ka najvišim ekonomskim i strateškim prioritetima kantona;
- uključivanje ograničenja potrošnje (plafona) za budžetske korisnike u Dokument okvirnog budžeta (DOB) za period 2008.- 2010. godina, kako bi se sve tekuće obaveze izmirlivale iz redovnih javnih prihoda;
- pripremu godišnjeg budžeta zasnivati na DOB-u, bez projekcije deficita;
- smanjenjem tekuće budžetske potrošnje uvođenjem programskog budžetiranja, sa jasno definisanim izlaznim rezultatima koji se postižu alokacijom sredstava ka datom sektoru,
- donošenjem Zakona o unutrašnjem dugu Kantona, kojim bi se omogućilo aktiviranje blokiranih budžetskih sredstava sa escrow računa;
- edukacijom budžetskih korisnika, organiziranjem radionica u cilju osiguranja efikasnijeg korištenja kadrovskih i materijalnih resursa kojima raspolaže Vlada,
- obezbijediti zalaganje i disciplinu svih aktera uključenih u budžetski proces kako bi se postiglo djelotvorno srednjoročno planiranje.

***Unapređivanju saradnje sa finansijskim institucijama i to:**

- praćenjem finansijskih i kreditnih odnosa sa domaćim i međunarodnim institucijama,
- jačanje finansijskog sistema Unsko – sanskog kantona,
- unapređenjem koordinacije rada sa poslovnim bankama u poslovima podsticanja privrednih investicija, pogotovo u sektorima supstitucije uvoza i podsticanja izvoza,

razvoja primarne poljoprivredne proizvodnje, prerađivačkih kapaciteta, podrške turističkom i ekološkom sektoru, razvoj malih i srednjih preduzeća i privatnih ustanova.

3.2. KANTONALNO MINISTARSTVO PRAVDE

U skladu sa strateškim ciljevima i obavezama Vlade na zaštiti i jačanju prava i osnovnih sloboda čovjeka, građanskih i ekonomsko-socijalnih prava i sloboda, vjerskih sloboda, jednakosti i ravnopravnosti naroda i građana i sprečavanju diskriminacije po bilo kom osnovu, te osiguranju vladavine prava, jačanja pravosudnog sistema i njegove neovisnosti, u oblasti pravde će se poduzimati sljedeće aktivnosti i realizirati slijedeći najznačajniji poslovi:

- na pripremama i izradi radnih materijala, prednacrtu, nacrtu i prijedloga zakona i drugih propisa iz nadležnosti ministarstva, prateći pri tome politiku djelovanja i strategiju Vlade Federacije BiH, uz kontinuirano praćenje donošenje novih i izmjena i dopuna važećih federalnih zakona i drugih propisa, na način da u skladu sa istim radi na donošenju, odnosno izmjenama kantonalnih propisa u skladu sa odredbama novih federalnih propisa ili u skladu sa njihovim izmjenama i dopunama;
- u skladu sa državnim, odnosno federalnim zakonom stvaranje uslova za donošenje i izrada nacrtu Zakona o Kantonalnom zavodu za pružanje besplatne pravne pomoći, čime se stvaraju uslovi za uštede u budžetu kantona u pogledu troškova odbrane po službenoj dužnosti, a istovremeno se građanima kantona (siromašnim) stvaraju uslovi za besplatnu zaštitu svojih prava pred sudovima i drugim organima i institucijama;
- nastaviti sa kontinuiranom nadležnošću u pogledu davanja mišljenja, prijedloga i sugestija za donošenje novih i izmjene postojećih propisa na nivou BiH, FBiH i USK-a;
- organizacijski i drugi poslovi usmjereni u prvom redu na poboljšanje uslova rada u sudovima Unsko-sanskog kantona, kao i u odnosu na druge pravosudne organe u širem smislu riječi (tužilaštvo, pravobranilaštvo, notari);
- stvaranje optimalnih uvjeta i temelja za provođenje projekata Visokog sudskog i tužilačkog vijeća Bosne i Hercegovine, drugih međunarodnih i domaćih organizacija u smislu modernizacije rada pravosudnih organa, boljeg i efikasnijeg nadzora nad tim radom od strane predsjednika sudova i VSTV-a BiH, naročito projekata registracije preduzeća i subjekata zemljišnih knjiga i dr.;
- rad na kadrovskoj osposobljenosti kantonalne upravne inspekcije u okviru Kantonalnog ministarstva pravde, kao i poboljšane uslova za provođenje upravnog i inspekcijaskog nadzora u stvarima i predmetima iz zakonske nadležnosti ministarstva;
- obavljanje stručnih i drugih poslova vezanih za nadležnosti ministarstva u ogledu polaganja stručnih upravnih ispita namještenika sa završenom srednjom stručnom spremom, a koji su u radnom odnosu u općinskim organima uprave;
- obavljanje i drugih upravnih i stručnih poslova u oblasti pravosuđa i uprave, kao i drugih poslova, koji u skladu sa zakonom ne spadaju u nadležnost drugog organa.

3.3. KANTONALNO MINISTARSTVO UNUTRAŠNJIH POSLOVA

U oblasti unutrašnjih poslova, pored ustaljenih obaveza, na osiguranju i jačanju mehanizama zaštite i sigurnosti građana i imovine, osnovni strateški ciljevi su i jačanja borbe protiv korupcije i svih oblika kriminala, a naročito organiziranog kriminala, i u skladu sa tim ciljevima, osiguranje potrebnih uslova za rad organa policije i drugih organa koji u svojoj nadležnosti imaju te poslove, te doprinos realizaciji procesa reforme policijskih snaga i drugih organa sigurnosti shodno zakonskim i drugim rješenjima koja budu definisana na nivou Bosne i Hercegovine.

Realizacija naprijed navedenih strateških ciljeva u oblasti unutrašnjih poslova podrazumjevaće, između ostalog, i izvršenje slijedećih poslova i zadataka:

- sprečavanje i otkrivanje krivičnih djela i počinitelja;
- smanjenje stope kriminaliteta, odnosno povećanje procenta otkrivenosti krivičnih djela;
- jačanju zakonitosti u radu;
- povjerenju javnosti u rad policije, te djelovanje policije kao dijela zajednice;
- osiguranje povoljne sigurnosne situacije u svim aspektima sigurnosti;
- efikasnija koordinacija institucija pravosuđa i policije;
- dosljednu izgradnju KMUP-a u jednu naprednu organizaciju s ciljem stvaranja demokratski orijentisane službe;
- depolitizacija policije;
- održavanje nivoa multietičnosti u policijskoj strukturi, u skladu sa Bonsko-petersburškim sporazumom;
- pružanje usluga građanima i javnosti na transparentan i fleksibilan način;
- kontinuirana edukacija pripadnika KMUP-a;
- sticanje povjerenje međunarodne zajednice i rad na ostvarivanje evropske integracije;
- raditi na jačanju kadrovske strukture (s posebnim osvrtom na diplomirane kriminaliste);
- reforma policije u Bosni i Hercegovini je jedan od presudnih uvjeta u ostvarivanju vladavine prava, sigurnosti i demokratizacije cjelokupnog društva. Svi procesi usmjereni ka uspostavi demokratske, moderne i funkcionalne policije, dugoročni su ciljevi BiH, a čiji je krajnji cilj priključenje naše zemlje europskim integracijama. Očekuje se da će reformom policije sve zakonske i budžetske nadležnosti vezane za rad policije biti prebačene na državni nivo, čime bi se rasteretili Kantoni. S druge strane, reforma policije trebala bi donijeti značajne prednosti i pripadnicima policije: bolje plaće, moderniju opremu i bolje prilike za napredovanje u karijeri. Vjeruje se da će se u skorjoj budućnosti reformom policije, dobiti policijske snage koje će još uspješnije i efikasnije djelovati u službi zajednice. Provedba reforme policije i odluka o uspostavljanju jedinstvene policijske strukture na nivou Bosne i Hercegovine, vrlo je kompleksna i zahtjevat će velik broj aktivnosti. Kantonalno ministarstvo unutrašnjih poslova Bihać, aktivno će se uključiti u proces reforme policijskih struktura u BiH. Ovo Ministarstvo među prvima je dobilo Zakon o policijskim službenicima, a KMUP Bihać pokrenuo je također inicijativu za donošenjem novog Zakona o unutrašnjim poslovima na nivou Federacije BiH.
- ustroj arhivskog depoa K MUP-a;
- kadrovsko jačanje policijskih struktura i službi Ministarstva,
- poboljšanje opremljenosti policije, održavanja prostora i opreme svih dijelova policije i Ministarstva,
- nabavka životinja (pasa);
- nabavka uniformi i dijelova uniformi u skladu sa Uredbom;
- nabavka informatičke opreme za krim.tehniku i KDZ;
- rekonstrukcija prostorija za zadržavanje osoba lišenih slobode u PS;
- nabavka kancelarijskog namještaja i ostalih kancelarijskih mašina;
- iznalaženje prostora za rad pripadnika OSA-e (KMUP-a plaća zakup prostora za OSU);
- nabavka auta presretača (zbog tendencije porasta saobraćajnih nezgoda, 24% više).

3.4. KANTONALNO MINISTARSTVO OBRAZOVANJA, NAUKE, KULTURE I SPORTA

Obrazovanje mora da zauzme svoje mjesto pokretačke snage koja omogućava napredak cijelog društva. Naš sistem obrazovanja ključan je za razvoj intelektualnog kapitala našeg kantona. Svjesni smo činjenice da je u sistemu obrazovanja na Unsko-sanskom kantonu potrebno hitno poduzeti kombinirane i održive korake u cilju poboljšanja kvaliteta obrazovanja uopće, te neprestano vršiti napore da se omogući pristupačan, prihvatljiv i efektivan sistem obrazovanja, a reforma obrazovanja je, definitivno, oblast u kojoj Unsko-sanski kanton ne može sebi priuštiti daljnja odlaganja.

Naša je obaveza da:

- uz konsultacije s obrazovnim institucijama Bosne i Hercegovine ali i uz adekvatnu ekspertizu u oblasti suvremenih principa nastavnog plana i programa izradimo suvremeni nastavni plan i program za svaki predmet;
- provedemo reviziju nastavnih predmeta i sistema za obuku nastavnika u osnovnim i srednjim školama prije zapošljavanja, uključujući značajno iskustvo u podučavanju;
- unaprijedit ćemo kvalitet procesa rukovođenja školama i predškolskim ustanovama, kako bismo osigurali da se njima rukovodi na moderan i demokratski način;
- osigurat ćemo da upravljanje u školama za stručno obrazovanje i obuku bude moderno i demokratsko, te da bude u uskoj saradnji sa poslodavcima, roditeljima i drugim nosiocima aktivnosti;
- poboljšat ćemo kvalitet visokog obrazovanja i istraživanja, bitno povećati broj osoba koje pristupaju visokom obrazovanju;
- dat ćemo samostalnost Univerzitetu u donošenju odluka, u osiguranju odgovornosti svih koji učestvuju u procesu, za kvalitet obrazovanja i nude, dobrobit studenata, standard, profesionalni razvoj osoblja i racionalizaciju administracije i rukovodstva;
- poboljšat ćemo racionalnost potrošnje i efikasnost budžetskih davanja sistemu obrazovanja i unutar sistema obrazovanja i poboljšati jednakost javnog finansiranja u obrazovanju;
- izradit ćemo, usvojiti i implementirati zakone koji su u skladu s ljudskim pravima i obrazovnim principima i standardima obuhvaćenim u Okvirnom zakonu;
- nakon usklađivanja kantonalnih zakona u oblasti odgoja i obrazovanja donesenim na državnom nivou, ministarstvo će pristupiti izradi podzakonskih akata.

Prioriteti Vlade Unsko-sanskog kantona u oblasti obrazovanja, nauke, kulture i sporta proizilaze iz već gore navedenih i već popisanih dokumenata kako na entitetskom tako i na državnom nivou koji za cilj imaju uspješnu provedbu reforme obrazovanja na svim nivoima.

Gledajući po oblastima, prioriteti su slijedeći:

Predškolski odgoj i obrazovanje – implementacija Zakona o principima lokalne samouprave u smislu prenosa ovlasti na nivo općine i usklađivanje prateće dokumentacije. Istovremeno je neophodno raditi na povećanju obuhvata djece predškolskim odgojem, te u tom pravcu posebnu pažnju posvetiti i privatnim predškolskim ustanovama.

Osnovno obrazovanje – implementacija zakona koji su u skladu s ljudskim pravima i obrazovnim principima i standardima obuhvaćenim u Okvirnom zakonu o osnovnoj i srednjoj školi, te izmjene i dopune Zakona o osnovnom i općem srednjem odgoju i obrazovanju. U ovom periodu, a radi zaokruživanja legislative neophodno je donijeti i nedostajuće pravilnike, te uraditi izmjene i dopune pedagoških standarda.

Kada je u pitanju kvalitet odgojno-obrazovnog rada, Ministarstvo planira uraditi edukaciju nastavnika i razredne i predmetne nastave, kako bi se kvalitetno realizirali svi zadaci. Naravno, sredstva predviđena u Budžetu će odrediti kojim tempom ćemo educirati nastavnike.

Ministarstvo kontinuirano radi na realizaciji Privremenog sporazuma o zadovoljavanju posebnih potreba i prava djece povratnika, te na Planu akcije o obrazovnim potrebama Roma i pripadnika ostalih nacionalnih manjina u BiH. Cilj ovih strateških dokumenata jeste realizacija Konvencije o pravima djeteta, odnosno omogućavanje svoj djeci ostvarivanje prava na obrazovanje. Jedan vrlo značajan korak u realizaciji ovih zadataka, a li i u podizanju kvaliteta obrazovanja na viši nivo jeste provedba projekata Pravo na obrazovanje i Predškolski odgoj i obrazovanje za rizične skupine djece koji se realiziraju uz pomoć Save the Children of Norway. Ministarstvo u narednom periodu mora pojačati materijalnu osnovu za učenike devetogodišnje škole.

Srednje obrazovanje – implementacija Zakona o srednjem stručnom obrazovanju po donošenju istog na nivou države, te zaokruživanje cjelokupne legislative koja proističe iz Zakona. I dalje raditi na poboljšanju rada škola kako u materijalnom tako i u kadrovskom smislu. Pojačati inspekcijski nadzor u školama pogotovo kada je u pitanju zapošljavanje novog nastavnog osoblja. Imati veći nadzor i u primjeni pedagoških standarda, a radi jačanja materijalne osnove u srednjem obrazovanju. Pratiti reformu srednjeg stručnog obrazovanja putem koordinatora za te poslove, te raditi na modernizaciji nastavnih planova i programa u školama koje rade po modularnom principu. Klasifikaciju zanimanja približiti školama, roditeljima i djeci. Pratiti razvoj i rad privatnih srednjih škola, te aktivno sudjelovati u svim reformskim aktivnostima koje se provode kako na nivou F BiH tako i na nivou BiH, a cilj je modernizacija i osavremenjivanje odgoja i obrazovanja. Pratiti također i ostvarivanje već potpisanih strateških dokumenata u srednjem obrazovanju. Započeti edukaciju menadžmenta škola i osposobiti ih za savremeno rukovođenje. Srednje škole uvezati sa tržištima rada i omogućiti im poslovanje s trećim licima, a u cilju materijalnog jačanja škola.

Visoko obrazovanje – Zakon o visokom obrazovanju na nivou države bi riješio mnoga pitanja i dileme. Do usvajanja tog zakona ostaje nam da uradimo slijedeće:

Da bi se uspostavila čvršća i sposobnija struktura Univerziteta neophodno je ukidanje pravnih struktura fakulteta, jačanje autoriteta rektora, centralizacija budžeta i računovodstva.

Radi postizanja evropskih standarda u procesu visokog obrazovanja neophodno je:

- ostvarivanje odgovarajućih općeprihvaćenih kriterija kvaliteta u obrazovanju
- efikasna organizacija obrazovnog procesa
- odgovarajuća ulaganja u opremu i objekte i održavanje istih
- dobar menadžment ljudskih potencijala
- stalno poboljšanje u informacionih sistema i u sistemu planiranja
- efikasnim sistemom finansiranja obrazovanja.

Pratiti provedbu Bolonjskog procesa i kvalitet usluga koje se nude studentima. Revidirati postojeće stanje na Univerzitetu u više pravaca, prvenstveno sagledati stanje u pogledu broja visokoškolskih ustanova koje mogu opstati. Poboljšati nastavni kadar kao i prostorne uvjete od kojeg će umnogome zavisi opstanak Univerziteta. Opstanak Univerziteta neminovno nalaže i potrebu jačanja studentskog standarda, te osiguranje prostornih uvjeta za iste. Nauci u okviru visokog obrazovanja posvetiti više pažnje, te povećati procenat izdvajanja za nauku.

Kako je jedan od ciljeva Lisabonske strategije iz 2000 godine stvaranje evropskog društva znanja i najjače svjetske ekonomije do 2010 godine, neophodno stvarati uvjete za realizaciju tog cilja.

Veći stepen nadzora u domenu zapošljavanja i opterećenosti nastavnika.

Kultura i sport- zakonodavstvo u sportu je dobro riješeno i u narednom periodu raditi na omasovljenju bavljenja sportom radi boljeg zdravlja i većeg stepena življenja, kao preduvjeta za kvalitetna život uopće. U oblasti kulture završiti legislativu, te kulturu približiti svakom čovjeku kroz različite vidove kulturnih dešavanja. Kroz djelatnost Zavoda za kulturno-historijsko naslijeđe aktivirati veću brigu očuvanja znamenitosti Kantona, za što je neophodno iznaći modele

finansiranja iz budžeta, fondova, javno-privatnog partnerstva, koncesija i slično, a u cilju stavljanja tih vrijednosti i u službu razvoja turizma i drugih djelatnosti.

3.5. KANTONALNO MINISTARSTVO PRIVREDE

U oblasti privrede poduzimat će se stalni napori u stvaranju povoljnijeg ambijenta, te predlagati zakonska i druga rješenja radi osiguranja optimalne klime za razvoj privrede na Unsko-sanskom kantonu. Potpuno i realno sagledavanje stanja u kojem se nalazi Unsko-sanski kanton i donošenje akcionog plana za prevazilaženje trenutne ekonomske situacije je prioritet Vlade, a Kantonalno ministarstvo privrede će biti nosilac tih aktivnosti. Akcioni plan bi potpuno definisao pravce djelovanja, nosioce aktivnosti i rokove u kojima bi se u mandatu ove Vlade zaustavili negativni ekonomski trendovi, a Unsko-sanski kanton krenuo pravcem razvoja i zauzimanja pozicije u Federaciji i državi BiH koju i zaslužuje. S tim u vezi potrebno je i uložiti maksimum napora da se preostalim preduzećima i privrednim subjektima obezbijedi kvalitetna privatizacija. Sve resurse i potencijale potrebno je uključiti u otvaranje novih radnih mjesta bilo kroz postojeće privredne subjekte ili otvaranje novih pogona.

Po granama djelatnosti Ministarstvo će poduzimati aktivnosti kako slijedi:

***Energetika, rudarstvo, industrija, poduzetništvo i obrt**

- u oblasti rudarstva aktivnosti će biti usmjerene na kvantitativno i kvalitativno definisanje prirodnog resursa kako bi se isti stavio u funkciju održivog privrednog razvoja Kantona putem dodjele koncesija i izgradnju novih proizvodnih kapaciteta sa ciljem otvaranja novih radnih mjesta i jačanja ekonomije Kantona;
- u oblasti industrije aktivnosti će biti usmjerene na okončanju procesa tranzicije državnog vlasništva u privrednim društvima kako bi se pokrenula proizvodna aktivnost u istim;
- posebna pažnja će biti usmjerena razvoju poduzetništva i obrta kroz različite vrste osmišljenih aktivnosti uz finansijsku podršku Kantona, te učešće općina i Federacije BiH putem, resornog ministarstva;
- kontinuirano pratiti konkurentnu sposobnost raspoloživog prirodnog resursa za proizvodnju električne energije (hidropotencijal i ugalj), te kada se stvore tehn-ekonomski preduslovi, putem dodjele koncesija, izgrađivati nove izvore električne energije;
- kontinuirano pratiti stvaranje zakonskih pretpostavki proizvodnje električne energije putem vjetroelektrana za čiju realizaciju postoje realni prirodni preduslovi na području općine Bos.Petrovac i Bihać, u području Kulen Vakuf.
- Budžetom Unsko-sanskog kantona nastojati, u okviru finansijskih mogućnosti Kantona, da se obezbijede finansijska sredstva za kvantitativno i kvalitativno definisanje prirodnih resursa kao preduslova najkvalitetnijeg mogućeg načina stavljanja tih resursa u funkciju održivog privrednog razvoja Kantona putem dodjele koncesija natječajem.
- djelovati putem svih nivoa vlasti na povećanju finansijskih ulaganja u elektro mrežu na području USK-a od strane JP «Elektroprivreda BiH», a sve u cilju omogućavanja pouzdanog i kvalitetnog napajanja električnom energijom potrošača na USK-u.
- pratiti izradu preinvesticionih studija gasifikacije Unsko – sanskog kantona
- kontinuirano djelovati na svim nivoima vlasti da se donese Zakon o rudarstvu na nivou Federacije BiH kojim bi se konačno, pored ostalog, utvrdila podjela nadležnosti korištenja prirodnih bogatstava na relaciji Federacija BiH-Kanton, te stvorili preduslovi efikasnijeg gazdovanja mineralnim sirovinama i spriječila nelegalna eksploatacija mineralnih sirovina na USK-u.
- tranzicija državnog kapitala uz finansijsku podršku Federacije i Kantona kako bi ista bila što uspješnija sa stanovišta pokretanja proizvodnje i zapošljavanja.

- Jačanje konkurentne sposobnosti privrede i jačanje poduzetništva kroz različite vidove poticaja i povoljnosti kao što su dostupnost proizvodnom resursu i povoljnim finansijskim sredstvima, te učešće općina i federalnog nivoa.

***Trgovina, turizam, ugostiteljstvo, promet i komunikacije**

- u oblasti trgovine Kantonalno ministarstvo privrede će se zalagati za stvaranje ambijenta u kojem će se uz zaštitu domaćih tržišnih faktora raditi i na zaštiti i promoviranju domaćih proizvoda kao i uravnoteženje interesa prodavaca i kupaca u cilju zaštite potrošača.
- očuvanje i zaštita životne sredine i prirodnih vrijednosti, kroz plansko korištenje i očuvanje prirodnih resursa, kako iste ne bi ugrozili industrijskim i drugim vrstama zagađenja. Podizati ekološku svijest građana i aktivno raditi na definiranju instituta i instrumenata kojima će se nastojati očuvati životna sredina. Poticati aktivnosti i u cilju promocije prirodnih potencijala i turističkih mogućnosti Unsko-sanskog kantona. Izgrađivati svijest o domaćem –autohtonom turističkom proizvodu i mogućnosti njegovog plasmana na zahtjevno turističko tržište putem domaćih turističko ugostiteljskih djelatnika.
- razvijati saobraćajni sistem kroz poticaje općinama i lokalnom stanovništvu u planiranju i izgradnji putnih komunikacija. Poboljšati suradnju sa višim nivoima vlasti u Bosni i Hercegovini u cilju planiranja i izgradnje novih cestovnih putnih pravaca u okviru izgradnje putne mreža na području Bosne i Hercegovine. Planirati da se stave u funkciju već postojeći željeznički putni pravci u cilju osiguranja rentabilnijeg i jeftinijeg transporta roba .
- kontinuirano surađivati sa Federalnim ministarstvom trgovine, Ministarstvom vanjske trgovine i ekonomskih poslova BiH, lokalnim vlastima, poduzetnicima, sindikatom, udruženjima građana u cilju ostvarenja što kvalitetnijeg ambijenta za obavljanje djelatnosti trgovine na području Unsko-sanskog kantona.
- kontinuirano pratiti situaciju u ovoj oblasti i u suradnji sa inspekcijskim organima raditi na provedbi propisa iz ove oblasti u cilju suzbijanja nelegalnog prometa roba.
- sukladno našim turističkim potencijalima i trendovima na turističkom tržištu definirati ciljeve i načela razvoja turizma u Unsko-sanskom kantonu.
- definirati autohtoni turistički proizvod našeg Kantona i objediniti općinske turističke destinacije u jedinstvenu turističku ponudu, te ih inkorporirati u jedinstven bosanskohercegovački turistički proizvod.
- intenzivirati suradnju sa svim nivoima vlasti u cilju brže modernizacije već postojeće putne mreže i izgradnje novih putnih pravaca.
- povećano ulaganje u rekonstrukciju cesta, a to su radovi na dijelu postojećih cesta kojim se mijenja njena temeljna karakteristika, a sa ciljem povećanja kapaciteta cesta i razine usluge;
- sanacija kritičnih mostova i većih propusta ili rekonstrukcija istih;
- sanacija prioritetnih klizišta na regionalnim cestama po „Elaboratu o sanaciji klizišta“;
- za sve planirane prioritete u sanaciji, rekonstrukciji ili izgradnji cesta, mostova i klizišta potrebna je revizija postojeće projektne dokumentacije, a gdje ista ne postoji i izrada projektne dokumentacije.

Kantonalna direkcija za ceste - svoje aktivnosti će usmjeriti na:

1. kontinuirano obezbijedenje svih preduslova za ispunjenje zakonskih obaveza u pogledu stvaranja uvjeta za sigurno odvijanje saobraćaja na cestama na području Unsko – sanskog kantona kroz redovno održavanje (u ljetnim i zimskim uvjetima) za što se usmjeravati 2/3 ukupno raspoloživih pripadajućih prihoda;

2. povećanju uslužnosti regionalnih cesta i stanju sigurnosti saobraćaja izdvajanjem za rekonstrukciju i modernizaciju značajnih cestovnih pravaca u saradnji sa organima Federacije Bosne i Hercegovine među kojima prioritarno:

- put R-401 (Bosanska Otoka – Bužim – Velika Kladuša), njegova rekonstrukcija je u podmakloj fazi, a za dovršetak i prekategoriizaciju u rang magistralne ceste neophodno je intenzivirati saradnju Kantona sa Vladom Federacije na kojem osnovu je i dosad odvijao posao rekonstrukcije ove ceste od izuzetnog značaja za sistem cesta Kantona.

- put R-403 (Tržačka Raštela – Kamenica – Bihać – Veliki Skočaj), rekonstrukcija ovog značajnog puta će biti u smislu rekonstrukcije kolovoza, raskrsnica i izgradnji pješačkih staza i za taj posao će biti potrebna dodatna sredstva sa nivoa Federacije Bosne i Hercegovine.

- put R-403b (tržac-Crnaja-Šturlić-Volovska-Grahovo), na ovom putu potrebno je rekonstruisati kolovoz, raskrsnice i izgraditi pješačke staze, također i uz saradnju sa organima Federacije Bosne i Hercegovine (finansijska i druga saradnja)

- obilaznica kroz Bužim (Konjodor – Brigovi), za ovaj put je urađena projektno-tehnička dokumentacija i započeti radovi na rekonstrukciji, a dovršetak istih moguće je samo uz dodatne izvore finansiranja (osim prihoda Direkcije i Budžeta Unsko – sanskog kantona).

- put R-405 (Gudovac-Sanski Most-Bronzani majdan, međuentitetska linija), ovaj put je izuzetno opterećen saobraćajem i njegova rekonstrukcija je imperativ sigurnosti i propusnosti saobraćaja u tim pravcima.

Pored navedenih aktivnosti, bit će nužno nastaviti poslove dogradnje i rekonstrukcije i na putevima koji su sada makadamski i kolovozni, a to su:

- put R-400, dionica Skokovi – Todorovo, nastaviti višegodišnje aktivnosti na ovoj dionici

- put R-404, dionica Bosanska Krupa – Arapuša, nastaviti višegodišnje aktivnosti na izgradnji ovog izuzetno značajnog regionalnog puta,

- put R-408b, dionica Vrtoče – Prkosi – Kulen Vakuf, kao kod prethodnog pravca, značajna za razvoj turizma.

Ne manje značajni poslovi od navedenih su i poslovi:

- rješavanje tranzitnog saobraćaja kroz naseljena mjesta u blizini graničnih prijelaza prevashodno područje Velike Kladuše – rekonstrukcija spoja regionalnih cesta R-401 i R-400 sa magistralnom cestom;

- rekonstrukcija raskrsnica na regionalnim cestama R-407a, R-402a, R-403b i R-405.

- sanacija najkritičnijih klizišta na regionalnim cestama: R-403a (Kamenica- Gata), R-403b (Johovica) i R-405 (Kisak),

- rekonstrukcija i izgradnja mostova: na regionalnoj cesti R-403 (još jedan most) na regionalnoj cesti R-405 (pripremljena projektno-tehnička dokumentacija i regionalnoj cesti R-401) (most preko rijeke Baštre)

Direkcija za ceste će i dalje direktno ili putem Vlade Unsko – sanskog kantona insistirati na realizaciji zacrtanih projekata na magistralnim cestama na području Unsko – sanskog kantona koje finansira ili treba finansirati Vlada Federacije Bosne i Hercegovine, a naročito:

- nastavak izgradnje magistralnog pravca Bihać-Bosanska Krupa preko Srbijanskog platoa;

- nastavak izgradnje obilaznice Velike Kladuše;

- izmiještanje dijela magistralne ceste Bihać – Izačić izvan naseljenih mjesta;

- izgradnja obilaznice Cazina;

- izgradnja obilaznice Ključa;

- izgradnja magistralnog pravca Kamenica – Bosovac – Miholjevac radi izravnijeg povezivanja graničnog prijelaza Izačić i sjeveroistoka Unsko – sanskog kantona;

- poboljšanje svih elemenata magistralnih cesta M – 5, M – 4 i M- 14.

Agencija za privatizaciju - svoje aktivnosti će usmjeriti na:

- okončanje postupka privatizacije u preduzećima komercijalnog karaktera
 - postupke obavljanja kontrole izvršenja obaveza iz kupoprodajnih ugovora i poduzimanja potrebnih mjera shodno utvrđenom stanju
 - nastavak započetih postupaka za raskid kupoprodajnih ugovora iz prethodnih godina (pred sudovima i na drugi način)
 - pripremu postupaka privatizacije u komunalnim preduzećima, medijima i veterinarskim stanicama;
 - utvrđivanje bilansa stanja i priprema za postupke prodaje u zemljoradničkim zadrugama;
 - pokretanje postupaka za naknadu štete usljed neizvršenja ugovorenih obaveza;
 - kontinuirano informiranje javnosti o svim postupcima, aktivnostima i procesima u vezi sa privatizacijom preduzeća komercijalnog karaktera koje su predmet privatizacije nalaze se u različitim fazama privatizacije nalaze se u različitim fazama privatizacije i to:
- a) Preduzeća koja nisu privatizirana:
- DI „Ključ“ doo Ključ
 - DD „Sana Keram“ Sanski Most
 - DD „Famos“ Sanski Most
 - DD „Krupatrans“ Bosanska Krupa
 - DOO „Amrateks“ Bosanska Krupa
- b) Preduzeća kojima je raskinut kupoprodajni ugovor:
- DD „Polietilenka“ Bihać
 - DOO „Agropromet“ Bihać

Za navedena preduzeća treba izvršiti reviziju poslovanja i ocijeniti od strane resornog ministarstva i Vlade Unsko – sanskog kantona koja od tih preduzeća da idu u ponovnu privatizaciju, a za koja je stečaj najracionalnije rješenje.

Posebnu grupu komercijalnih preduzeća predstavljaju ona preduzeća kod kojih je u toku sudski postupak za raskid ugovora o privatizaciji (GP „Izgradnja“ Bihać, DD „Agrokrajina“ Bihać, GP „Rad“ Cazin, DD „Novitet“ Bosanski Petrovac, DOO „Gumara“ Stari Majdan i „Rudnik boksita“ doo Bosanska Krupa) i po pravosnažnom okončanju sudskih postupaka Agencija za privatizaciju će poduzeti mjere u skladu sa rezultatima tih postupaka.

U oblasti privatizacije preduzeća iz oblasti informisanja elektronskih i štampanih medija smjernice će za proces privatizacije dati organi Unsko – sanskog kantona (JP RTV USK i NIP „Unsko – sanske novine“) odnosno općina za preduzeća čije su općine sa područja Unsko – sanskog kantona osnivači, a mišljenja smo da bi Vlada i Skupština Unsko – sanskog kantona trebale održati tematske sjednice u vezi privatizacije preduzeća iz tih oblasti zbog značaja koje mediji imaju u ukupnom društvenom i političkom životu Kantona.

Privatizacija preduzeća iz oblasti komunalne djelatnosti u 2008.godini će ući u fazi pripreme i utvrđivanja bilansa stanja za privatizaciju, a sam tok privatizacije zavisit će od politike koja se definiše jedinstveno na nivou Federacije BiH i bez obzira šta su općine osnivači i upravljanju državnom kapitalom u tim preduzećima, Vlada i Skupština Unsko – sanskog kantona zbog opće društvenog značaja djelatnosti i javnih ovlaštenja koje vrše ta preduzeća, treba da zauzmu stavove i daju preporuke za tok privatizacije u toj oblasti, a na Informacije koju bi u prvoj polovini 2008.godine sačinila Agencija.

Slično stanje, procesi i zahtjevi su i u vezi privatizacije veterinarskih preduzeća na području Unsko – sanskog kantona, kao i kod komunalnih preduzeća.

U procesu privatizacije zemljoradničkih zadruga je za dio zadruga završen postupak utvrđivanja bilansa stanja ZZ „Ostrovica“ Kulen Vakuf, ZZ „Krupa“ Bosanska Krupa, OZZ „Otoka“ Bosanska Otoka, OZZ „Klas“ Sanica, OZZ „Centar“ Ključ i ZZ „Poljoprom“ Sanski Most, a za dio zadruga u toku je revizija (ZZ „Alija Alijagić“ Bihać i ZZ „Trgozad“ Bužim) ali će ukupna procedura tražiti prethodno usaglašavanje sa općinskim zakonom o zadrugama i u tom smislu će biti nužni usaglašeni stavovi Saveza ZZ F BiH, resornog kantonalnog ministarstva i Vlade Unsko – saskog kantona.

Posebno pitanje privatizacije će biti pitanje „Agrokomerca“ d.d. Velika Kladuša za koje bi se preduzeće u 2008.godini konačno trebalo definisati vršenje prava upravljanja državnim kapitalom i privatizacije istog što nije moguće bez učešća organa Federacije BiH i bez definisanja odnosa, prava i postupaka prema imovini tog preduzeća u inostranstvu (pasivni podbilans) koja čini vrlo značajan dio ukupne imovine i ekonomskog potencijala tog preduzeća.

3.6. KANTONALNO MINISTARSTVO POLJOPRIVREDE, VODOPRIVREDE I ŠUMARSTVA

Budućnost Unsko-saskog kantona nedvojbeno može biti zasnovana na očuvanju tla, vodoprivrede i šumarstva, kao bogomdanim vrijednostima koje imamo i na tim osnovama pored turizma, razvoj poljoprivrede, održive proizvodnje zdrave hrane, lova, ribolova i stim povezanih proizvodnih djelatnosti i usluga. Polazeći od činjenice da su osnovni ciljevi Vlade Unsko-saskog kantona intenziviranje poljoprivrednog razvoja, kao i iniciranje i provođenje reformi usklađenih sa potrebama BiH na putu pridruživanja Evropskoj Uniji, a imajući u vidu komparativne prednosti koje Unsko-sanski kanton ima, Ministarstvo poljoprivrede, vodoprivrede i šumarstva USK-a planira da u ovom periodu:

- promijeni odnos prema selu, poljoprivredi i šumarstvu kroz poticaj proizvodnje zdrave hrane i očuvanje zemljišta;
- ukupnu poljoprivrednu politiku harmonizira sa jedinstvenim politikama i standardima EU;
- donese sveobuhvatnu poljoprivrednu strategiju;
- uskladi domaće zakonodavstvo i statistike sa standardima i metodologijom EU;
- pravno i institucionalno urediti sektor voda, vrednuje njihov strateški značaj i osigura adekvatnu zaštitu;
- da se obezbijede uslovi za racionalno korištenje šuma i šumskog zemljišta, uzgoj i integralnu zaštitu šuma u cjelini.

U skladu s tim, preduzimat će se sljedeće mjere i aktivnosti na:

- još boljem uvezivanju raslojene poljoprivredne infrastrukture na kantonu i pripremi legislative koja će osigurati harmonizaciju sa jedinstvenim poljoprivrednim politikama i standardima EU;
- modernizaciji proizvodnje, povećanja obima i prilagođavanja strukture agroindustrijske proizvodnje koja trajno obezbjeđuje prehrambenu sigurnost i održivost poljoprivrednog sektora sa efikasnijom proizvodnjom zdrave hrane;
- otvaranju novih radnih mjesta u poljoprivrednom sektoru i na vlastitim poljoprivrednim gazdinstvima kroz njihovo povećanje i rekonstrukciju, kao i promociju proizvođača hrane čiji proizvodi supstituišu uvoz;
- racionalizaciji proizvodne strukture putem umanjenja manje profitabilnih proizvodnji i uvećanja onih koje omogućuju veće zarade i postizanje konkurentnosti na tržištu;
- očuvanju i zaštiti poljoprivrednog zemljišta, sa posebnim fokusom na državno zemljište, te uspostava ZIS-a za potrebe zaštite i optimalnog korištenja tla;

- jačanju produktivnosti i ekonomskoj zaštiti tržišno orijentisanih poljoprivrednih proizvođača, zaustavljanju depopulacije, uz revitalizaciju seoskih, posebno brdsko-planinskih područja;
- razvoju organske proizvodnje hrane i standardizaciji autotohnnih proizvoda sa geografskim porijeklom i specifičnim kvalitetom;
- osnivanju stručne poljoprivredne službe;
- utvrđivanju lovišta i organizacije lovstva u skladu sa Zakonom o lovstvu i drugim propisima te potrebama razvoja i zaštite lovnih potencijala te turizma, sporta i drugih oblika aktivnosti, privređivanja i usluga vezanih za oblast;
- suzbijanju i iskorjenjavanju zaraznih bolesti životinja, a posebno zoonoza;
- registraciji svih imanja i obilježavanje i kontrola kretanja životinja (goveda i ovaca) u funkciji nadzora nad zaraznim bolestima i sljedivosti hrane;
- u skladu sa novim Zakonom o vodama, donošenje strategije upravljanja vodama, kao i planova i programa mjera za vrednovanje njihovog statusa, strateškog značaja i njihove zaštite;
- podizanju higijensko-zdravstvenih uslova života na viši nivo kroz unapređenje i izgradnju sistema za snabdijevanje pitkom vodom stanovništva na području Unsko-sanskog kantona kao i izgradnje odvodnih kanalizacionih sistema sa uređajima za prečišćavanje. Cilj je priključenje što većeg broja stanovnika na javne vodovodne sisteme, čija se kontrola kvalitet vode provodi redovno. Seoski i drugi vodovodi su djelomično pod kontrolom pa je neophodno i ove sisteme za snabdijevanje rekonstruisati i staviti pod nadzor. Skoro svi gradovi imaju dotrajale kanalizacione gradske sisteme, koji su još narušeni tokom ratnih dejstava. Radi podizanja ekoloških uslova na viši stupanj, potrebno je staviti u prioritetne ciljeve sanaciju i izgradnju ovih sistema;
- pravnom i institucionalnom uređenju kompletnog sektora voda na području BiH. Implementacija novog Zakona o vodama F BiH („Sl.novine F BiH“, br.70/06), donošenjem neophodnih akata za implementaciju ovog zakona na nivou Kantona;
- osiguranju upravljanja ribolovnim potencijalima u skladu sa Zakonom o ribolovstvu;
- implementirati u potpunosti Zakon o šumama;
- osiguranju efektivnog i efikasnog rada Kantonalne uprave za šumarstvo radi efikasnog nadzora nad šumama i šumarskim preduzećem.

3.7. KANTONALNO MINISTARSTVO ZDRAVSTVA, RADA I SOCIJALNE POLITIKE

Zdravstveni sistem je jedan od najboljih pokazatelja na kom se stepenu razvoja nalazi društvo i biće učinjeno sve da se stvore uslovi da se u našem zdravstvenom sistemu, koji je već dugo u lošoj organizacijskoj, kadrovskoj i materijalnoj situaciji, ostvari pravo na bolju zdravstvenu zaštitu, što je jedan od prioritetnih ciljeva. Institucije zdravstvene zaštite rade u dosta teškim uvjetima, a najveći problem predstavlja zastarjela oprema i nedostatak osnovnih uslova za rad. Zdravstvena zaštita mora biti podignuta na jedan daleko viši nivo i dostupna svim građanima. Da bi se to postiglo potrebno je izvršiti promjene i u odgovarajućim zakonskim propisima.

Ministarstvo će u svojoj nadležnosti i svom djelovanju aktivno učestvovati i inicirati izradu cjelovite strategije i programa unapređenja zdravstvene zaštite na našem Kantonu. Kantonalnu bolnicu“dr.Irfan Ljubijankić“ Bihac treba izgraditi u moderan kliničko-bolnički centar koji može kvalitetno zadovoljiti potrebe građana u oblasti zdravstva. Otvaranje opće bolnice u Sanskom Mostu u toku ove godine u mnogome će podići nivo zdravstvene zaštite u tom dijelu USK-a.

Najveći dio socijalnih problema Kantona ima svoje izvorište u visokom stepenu nezaposlenosti, odnosno niskim primanjima i životnom standardu. Ovi problemi se očituju u socijalnom sektoru, njihovo rješenje je u direktnoj vezi sa inicijativama iz oblasti kreiranja novih radnih mjesta i privrednog razvoja, što spada u domen ekonomije.

Kanton kao administrativno-politička jedinica u sastavu države ima limitiran utjecaj u domenu socijalnog sektora, a naročito u dijelu njegove systemske, pravne i institucionalne prirode. Sistem socijalne zaštite mora pružati sigurnost, mora se temeljiti na pravednosti i mora biti održiv, te mora osigurati ravnomjernost u podjeli tereta socijalne zaštite između različitih generacija, i između građana različitih generacija, i između građana različitih položaja.

Ostvarivanje ciljeva u ovim oblastima odvijat će se kroz poslove i aktivnosti, po oblastima kako slijedi:

***Zdravstvena zaštita**

- izvršiti istraživanje i monitoring u sektoru zdravstva, te utvrditi prioritetne programe i projekte kroz definiranje strategija oblasti zdravstvene zaštite;
- jačati instituciju porodične medicine;
- stvaranje održivog zdravstvenog sistema i solidarnosti na nivou cijele BiH, u skladu sa ustavima i zakonima;
- zaključiti novi kolektivni ugovor u oblasti zdravstva i ojačati materijalni položaj uposlenih;
- osnovati fondove solidarnosti;
- poboljšanje liste esencijalnih lijekova i provjera efikasnosti i sprječavanja nezakonitosti u prometu lijekova;
- osigurati garantirani nivo paketa usluga zdravstvene zaštite;
- pronalaziti izvore stimulativnog finansiranja zdravstvenih ustanova u reformisanju zdravstvenog sistema u Unsko-sanskom kantonu;
- jačanje nadzora nad funkcionisanjem sistema zdravstvenog osiguranja i ekonomičnosti upotrebe sredstava zavoda zdravstvene zaštite;
- jačanje upravljačkih i menadžerskih struktura u zdravstvenim ustanovama;
- uspostaviti poslovnu suradnju sa Kliničkim bolničkim centrom u Sarajevu i ispoštovati zakonsku regulativu u nastavku rada i djelovanja;
- uključivanje privatnog sektora zdravstvene zaštite u sistem zdravstvene zaštite shodno federalnim propisima;
- obezbjeđenje zaštite najranjivijih društvenih grupa;
- promoviranje jednakih mogućnosti građana;
- poboljšanje informisanja građana o različitim programima socijalne zaštite ;
- podsticanje zapošljavanja uz kontinuirano stjecanje novih vještina, te
- garantovanje adekvatnog nivoa socijalne zaštite;
- evropske suradnje u procesima migracije stanovništva;
- redovna istraživanja siromaštva i evidencije socijalnih stanja pojedinaca;
- zaštita žrtava nasilja naročito nad ženama i djecom;
- zaštita majčinstva i djece.

***Rad i zapošljavanje**

Među najznačajnijim problemima koje ovo Ministarstvo ima za cilj razrješavati u narednom periodu je eliminisanje razloga visoke stope nezaposlenosti, ali to je širi društveni problem i traži angažman i drugih ministarstava i institucija, a ne samo na nivou Kantona već i entiteta i države. Vlada će načelo socijalnog partnerstva u potpunosti primjenjivati, jer vjerujemo

sindikata i poslodavcima u postizanju zajedničkog cilja. Naime, iako su nam uloge u društvu drukčije i različite, cilj nam je isti. USK mora biti i socijalno osjetljiv, ali isto tako ne dovodeći u pitanje načela tržišne privrede. Uspostavljanje i kvalitetno funkcionisanje socioekonomskih dijaloga triju sektora: javnog, privatnog i nevladinog (sindikat) na partnerskoj osnovi kroz instrument Ekonomsko-socijalnog vijeća na nivou Unsko-sanskog kantona predstavlja bitan preduslov za donošenje usaglašenih i opće prihvaćenih razvojnih odluka. Rad ovakvog vijeća osigurat će ambijent međusobnog uvažavanja, razumijevanja i poštovanja različitih interesa socijalnih partnera u društvu. S obzirom na sve probleme kojima se ovaj Kanton u prošlosti susretao upravo na ovom polju, ovu mjeru smatramo jednom od značajnijih. Bez uspostavljanja socijalnog dijaloga između Vlade, poslodavaca i sindikata, nema ni napretka, jer mi se borimo za interese isti ljudi i ne smijemo nikako biti suprostavljene strane.

3.8. KANTONALNO MINISTARSTVO ZA PITANJE BORACA I RVI

Problematiku iz oblasti boračko-invalidske zaštite rješavati prioritetno, te na takav način dati značaj i poseban osjećaj vrijednosti njihovog doprinosa u stvaranju države.

U narednom periodu potrebno je:

- u potpunosti primjenjivati i dograđivati zakonska rješenja u oblasti zaštite i ostvarivanja prava boračke populacije, prije svega Zakona o dopunskim pravima branilaca i članova njihovih porodica, a u skladu s uočenim nedostacima prilikom implementacije istog;
- nastaviti rješavati stambenu problematiku boračke populacije putem Kantonalnog Fonda za izgradnju stanova porodica šehida i porodica boraca, ratnih vojnih invalida i demobilisanih boraca, obezbjeđujući sredstva za ove namjene, a kako bi isti mogao odgovoriti potrebama ove populacije;
- pratiti stanje provođenja Zakona o dopunskim pravima branilaca i članova njihovih porodica po općinama, te obezbjeđivati sredstva u budžetu po različitim osnovama: priključak električne energije i vode, pretvorba poljoprivrednog u nepoljoprivredno zemljište, refundacija troškova liječenja, školovanja, dženaza-sahrana i dr.;
- rješavati probleme nezaposlenih lica ovih kategorija, te stvoriti materijalnu sigurnost njih i njihovih porodica;
- pratiti značajne datume i mjesta od kantonalnog interesa u cilju obilježavanja istih, te i na takav način dati važnost periodu iz novije historije, odnosno periodu odbrambeno-oslobodilačkog rata 1992-1995. godine;
- usklađivanje Zakona o dopunskim pravima branilaca i članova njihovih porodica- Kantonalni zakon („Sl.glasnik USK-a“, broj:3/2005) sa Zakonom o pravima demobiliziranih branilaca i članova njihovih porodica („Sl. novine FBiH“, broj: 61/06);
- vođenje javne rasprave o jedinstvenom zakonu boračkih kategorija u cilju objedinjavanja sadašnja tri zakona, te preispitivanja priznatih prava i položaja korisnika istih (jedinствени zakon za RVI, porodice šehida i poginulih boraca, dobitnike ratnih priznanja i odlikovanja i demobilisanih boraca)-2007. godina;
- izmjene i dopune Pravilnika o unutrašnjoj organizaciji Ministarstva-usklađivanje Pravilnika sa izmjenama i dopunama Zakona o državnoj službi u F BiH i Zakonom o namještenicima (vraćanje Odjeljenja za boračko-invalidsku zaštitu u nadležnost općina);
- vođenje aktivnosti na formiranju jedinstvene boračke organizacije na području USK-a;
- uspostava jedinstvenog programa evidencije boračkih kategorija (evidencija svih boračkih kategorija putem jedinstvenog i jednoobraznog programskog softvera) za 2009. godinu.

3.9. KANTONALNO MINISTARSTVO ZA GRAĐENJE, PROSTORNO UREĐENJE I ZAŠTITU OKOLINE

Najvažniji ciljevi u oblasti prostornog uređenja, zaštite čovjekove okoline i građenja neodvojivi su od općeg cilja moderne civilizacije koji se ogleda u očuvanju i zaštiti čovjekove okoline kao glavnog uslova kvaliteta života i privrednog razvoja. Dalje podizanje svijesti o nužnosti očuvanju i zaštiti čovjekove okoline u navedenom smislu je stalni zadatak Vlade i svih segmenata javne uprave i civilnog društva. Zaštita čovjekove okoline svakako nije moguća bez planiranja upotrebe i upravljanja prostorom pa u tom smislu usvajanje Prostornog plana Unsko-sanskog kantona od strane Skupštine USK-a kojeg će Vlada predložiti, je najvažnije u tom cilju ali i za ukupno planiranje života i razvoja na području Kantona. Pitanje upravljanja otpadom i njegovog odlaganja je u uslov ostvarenja navedenih ciljeva u ovim oblastima pa će konačno definisanje lokacije, izgradnja te funkcionisanje Regionalne deponije biti prioritarno u realizaciji ekoloških zahtjeva i standarda te zakonske obaveze u tom segmentu. Saniranje bespravne gradnje i uvođenje reda u oblasti građenja je zadatak koji će biti nužno ostvariti u saradnji sa organima lokalne samouprave. Po oblastima, najvažniji poslovi i zadaci u ovom periodu su:

***Iz oblasti prostornog uređenja:**

- donošenje Prostornog plana USK-a
- provođenje Prostornog plana USK-a
- donošenje izmjena i dopuna prostornog plana USK-a, kao i praćenje stanja i pojava u oblasti urbanizma u cilju uređenja i politike korištenja zemljišta na kantonalnom nivou

***Iz oblasti građenja:**

- u cilju efikasnije zakonske regulative za građenje izvršiće se analiza postojećih tehničkih propisa iz oblasti građevinarstva i učestvovanje u izradi novih propisa
- izrada informacija, analiza, izvještaja i mišljenja u oblasti građenja u cilju suzbijanja bespravne gradnje
- provođenje mjera suzbijanja bespravne gradnje
- izrada snimka postojećeg stanja
- donošenje programa legalizacije i programa rušenja objekata od strane općina USK-a

***Iz oblasti zaštite okoliša:**

- aktivnosti na utvrđivanju mikrolokacije za sanitarnu regionalnu deponiju
- izrada zakonskih i drugih akata iz oblasti zaštite okoliša (izrada Kantonalnog pravilnika o izdavanju okolinskih dozvola)
- uspostava katastra zagađivača
- implementacija Zakona o zaštiti okoliša
- izdavanje okolinskih dozvola kako za nova tako i za postojeća postrojenja i instalacije sa mjerama zaštite od štetnog uticaja na okoliš

***Iz geodetske i imovinsko-pravne oblasti**

- izvršiti provođenje reforme Geodetske uprave u cilju implementacije Zakona o premjeru i katastru nekretnina koji je usvojen u nacrtu i
- učešće u Projektu Zemljišne administracije po pitanju harmonizaciju podataka

3.10. INFORMATIZACIJA I INFORMISANJE

Vlada u ovom mandatnom periodu mora osigurati pretpostavke da Unsko-sanski kanton nezaostane od globalnog stanja i trenda opće informatizacije društva i u tom smislu mora u svim segmentima svoga rada uticati da se znanje i informacije prenose, koriste i razumijevaju najmodernijim sredstvima informaciono-komunikacione tehnologije, poštujući standarde i propise koje Bosna i Hercegovina donese i prihvata.

Pristup informacionim tehnologijama i sredstvima, edukacijama i korištenje za sve slojeve stanovništva Kantona mora biti cilj u aktivnostima i poslovima svih državnih institucija i osiguranje podsticaja za te namjene kao i poduzetništva i civilne inicijative u toj oblasti postavlja se kao cilj održivosti i osnovne pismenosti u modernom društvu.

Osiguranje pristupa informaciono-komunikacionoj tehnologiji po najpovoljnijim uslovima bit će zahtjev Vlade prema javnim preduzećima koja pružaju te usluge, a svi programi obrazovanja na svim nivoima školovanja moraju biti zasnovani na korištenju tih tehnologija.

3.11. REZIME

Vlada USK-a će u mandatnom periodu i u skladu sa ovim Programom rada za 2008. godinu, a u skladu sa svojim ustavnim nadležnostima, biti orijentisana zadacima i aktivnostima koje će doprinijeti ekonomskom i socijalnom jačanju Unsko-sanskog kantona.

Nakon usvajanja ovog dokumenta od strane Skupštine Unsko-sanskog kantona, Vlada Kantona će kroz svoje operativne planove i kroz realizaciju planiranih aktivnosti učiniti sve da popravi sadašnje stanje i pokrene Kanton ka održivom razvoju i dobrobiti svih naših građana.

Činjenica je da se na putu unapređenja ekonomskog razvoja nalazi dosta prepreka koje je potrebno otkloniti, ali samo uz zajedničku akciju Skupštine i Vlade, svih kompetentnih pojedinaca i institucija na Unsko-sanskom kantonu, te angažman svih raspoloživih resursa i potencijala, osigurat će se potpuna realizacija ovog Programa.

Vjerujemo da će kvalitet ovog Programa doći do izražaja u konkretnim rezultatima, odlukama i potezima ove Vlade i ove Skupštine. Naš cilj, i kao što smo već rekli cilj ovog Programa, je služiti građanima i rješavati probleme građana.

Upravo ovaj Program omogućuje da svi zajedno pratimo i ocjenjujemo svoj rad i doprinos u realizaciji postavljenih ciljeva i zadataka, a naši građani će zasigurno prepoznati rad i zalaganje svakog od nas.

4. KARTE PROJEKATA FBiH I UNSKO-SANSKOG KANTONA

U narednom prilogu daje se pregled projekata koji se odnose na putnu infrastrukturu i planirani projekat gasifikacije Unsko-sanskog kantona.

5. OPERATIVNI PLAN VLADE UNSKO-SANSKOG KANTONA U 2008. GODINI

U skladu sa odredbama Poslovnika o radu Vlade Unsko-sanskog kantona („Službeni list Unsko-sanskog kantona“ br.4/97), Vlada Unsko-sanskog kantona donosi svoj godišnji Program rada.

Program rada Vlade Kantona sadrži najznačajnije zadatke koje Vlada treba obaviti u toku godine, nosioce priprema materijala i rokove u kojima će se pojedina pitanja razmatrati.

Vlada Unsko-sanskog kantona će u ovom razmatrati i druga pitanja iz svoje nadležnosti koja pokrenu ovlašteni predlagači, kao i druga pitanja koja ocijeni svrsishodnim. Predmet posebnog razmatranja od strane Vlade Unsko-sanskog kantona bit će i ona pitanja koja nisu utvrđena ovim programom, a njihovo razmatranje bude zatraženo od strane Skupštine Kantona na osnovu ustavnih i zakonskih ovlaštenja.

U narednom prilogu daje se pregled ključnih normativnih, analitičkih i informativnih aktivnosti u 2008. godini, bez detaljnog upuštanja u redovne resorske poslove koje svako ministarstvo ima po zakonu u svom djelokrugu rada.

1. KANTONALNO MINISTARSTVO FINANSIJA

O P I S	R O K
NORMATIVNI DIO	
I ZAKONI	
1. Budžet Unsko-sanskog kantona za 2008. godinu	Februar
2. Zakon o izvršenju Budžeta Unsko-sanskog kantona za 2008. godinu	Februar
3. Zakon o administrativnim taksama i tarifí administrativnih taksa	April - Maj
4. Dokument okvirnog budžeta Unsko-sanskog kantona za 2009-2011	Juni
5. Zakon o utvrđivanju i načinu izmirenja unutrašnjih obaveza Unsko-sanskog kantona	Septembar
6. Izmjene i dopune Budžeta Unsko-sanskog kantona za 2008. godinu	Po potrebi
7. Izmjene i dopune Zakona o izvršenju Budžeta Unsko-sanskog kantona za 2008. godinu	Po potrebi
8. Nacrt Budžeta za 2009. godinu	Novembar
9. Nacrt Zakona o izvršavanju Budžeta za 2009. godinu	Novembar
II PODZAKONSKI AKTI	
ANALITIČKO-INFORMATIVNI DIO	
1. Izvještaj o radu ministarstva za 2007. godinu	Februar
2. Godišnji obračun Budžeta Unsko-sanskog kantona za 2007.godinu	Mart
3. Izvještaj o izvršenju Budžeta Unsko-sanskog kantona za 2007. godinu	Maj
4. Izvještaj o utrošenim sredstvima budžetske rezerve	Kvartalno
5. Program rada ministarstva za 2009.godinu	Decembar

2. KANTONALNO MINISTARSTVO PRAVDE

O P I S	ROK
NORMATIVNI DIO	
I ZAKONI	
1. Zakon o Vladi Unsko – sanskog kantona - Prijedlog	Februar
2. Zakon o kantonalnim ministarstvima i drugim tijelima kantonalne uprave – Prijedlog	Mart
3. Zakon o lokalnoj samoupravi	April
4. Zakon o izmjenama i dopunama Zakona o pravobranilaštvu	April
5. Zakon o Kantonalnom zavodu za pružanje besplatne pravne pomoći	Juli
6. Zakon o inspekcijama Unsko-sanskog kantona	Nakon donošenja na nivou F BiH
II PODZAKONSKI AKTI	
ANALITIČKO-INFORMATIVNI DIO	
1. Izvještaj o radu ministarstva za 2007. godinu	Februar
2. Obavještenje o stanju u oblasti pravosudnih organa u Unsko-sanskom kantonu	Mart
3. Program rada ministarstva za 2009.godinu	Decembar

3. KANTONALNO MINISTARSTVO OBRAZOVANJA, NAUKE, KULTURE I SPORTA

O P I S	R O K
NORMATIVNI DIO	
I ZAKONI	
1. Zakon o visokom obrazovanju (usklađivanje s Okvirnim zakonom)	Nacrt-mart Prijedlog- april
2. Zakon o sprječavanju nasilja i nedoličnog ponašanja na sportskim terenima	Nacrt-april Prijedlog- maj
3. Zakon o izmjenama i dopunama Zakona o Univerzitetu u Bihaću	Po donošenju Zakona o visokom obrazovanju
4. Zakon o kulturi	Nacrt- april Prijedlog-maj
5. Zakon o izmjenama i dopunama Zakona o predškolstvu Unsko – sanskog kantona	Po donošenju Zakona o lokalnoj samoupravi
6. Zakon o izmjenama i dopunama Zakona o osnovnom i općem srednjem odgoju i obrazovanju	Po donošenju Zakona o lokalnoj samoupravi
7. Zakon o izmjenama i dopunama Zakona o srednjoj školi	Po donošenju Okvirnog Zakona o srednjem stručnom obrazovanju
II PODZAKONSKI AKTI	
1. Pravilnik o plaćama i drugim primanjima zaposlenika u predškolskim ustanovama, osnovnim i srednjim školama i visokoškolskim ustanovama Unsko – sanskog kantona	Po donošenju Kolektivnog ugovora
ANALITIČKO-INFORMATIVNI DIO	
1. Plan i program rada kantonalnih ustanova, kantonalnih medija i Sportskog saveza Unsko-sanskog kantona za 2008. godinu: - JU Muzej USK-a - JU Arhiv USK-a - JU Kantonalna univerzitetska biblioteka - JU Zavod za zaštitu kulturnog naslijeđa - JU Spomen biblioteka „Skender Kulenović“ Bosanski Petrovac - JU Radio-televizija USK-a - JP Unsko-sanske novine „Krajina“ - Sportski savez USK-a	Februar
2. Izvješćaji o radu kantonalnih ustanova kulture i kantonalnih medija u 2007. godini: - - JU Muzej USK-a - JU Arhiv USK-a - JU Kantonalna univerzitetska biblioteka - JU Zavod za zaštitu kulturnog naslijeđa - JU Spomen biblioteka „Skender Kulenović“ Bosanski Petrovac - JU Radio-televizija USK-a - JP Unsko-sanske novine „Krajina“	Februar
3. Izvješćaj o radu Sportskog saveza USK-a za 2007. godinu s ocjenom stanja u oblasti sporta i finansijskim pokazateljima	Februar
4. Izvješćaj o radu Univerziteta u Bihaću za akademsku 2006/07	Februar

5. Informacija o stanju školskih objekata i prijedlog raspodjele sredstava Budžeta Unsko – sanskog kantona za rekonstrukciju i investiciono održavanje škola	Mart
6. Program utroška sredstava granta za kulturu, granta za vjeru i granta za mlade	Mart.
7. Izvještaj o radu Kantonalnog ministarstva obrazovanja, nauke, kulture i sporta za 2007.godinu	Mart
8. Informacija o provedbi projekta „Zaštita i reintegracija maloljetnika s posebnim fizičkim i psihičkim potrebama u školski sistem“ s rezultatima provođenja projekta	April
9. Informacija o provedbi projekta „Pravo na obrazovanje“ s rezultatima provedbe projekta	April
10. Informacija o evaluaciji prve trijade devetogodišnjeg osnovnog obrazovanja u osnovnim školama Unsko – sanskog kantona	April
11. Izvještaj o provođenju EU VET programa u srednjim školama Unsko – sanskog kantona	Juni
12. Informacija o aktivnostima vezanim za provođenje Zakona o sigurnosti saobraćaja na cestama u Bosni i Hercegovini	Juni
13. Informacija o djeci osnovnoškolskog uzrasta koji ne pohađaju nastavu, s prijedlogom mjera i aktivnosti	Oktobar
14. Izvještaj o radu odgojno-obrazovnih ustanova Unsko – sanskog kantona u školskoj 2007/08	Novembar
15. Informacija o početku školske 2008/09 godine u odgojno-obrazovnim ustanovama Unsko – sanskog kantona	Novembar .
16. Informacija o stanju objekata kulturnog naslijeđa na području Unsko-sanskog kantona	Novembar
17. Program rada Kantonalnog ministarstva obrazovanja, nauke, kulture i sporta za 2009.godinu	Decembar

4. KANTONALNO MINISTARSTVO UNUTRAŠNJIH POSLOVA

O P I S	ROK
NORMATIVNI DIO	
I ZAKONI	
1. Zakon o izmjenama i dopunama Zakona o policijskim službenicima USK-a (Nacrt)	Nakon usvajanja na nivou F BiH
2. Zakon o unutrašnjim poslovima Unsko – sanskog kantona (Nacrt)	- //-
II PODZAKONSKI AKTI	
1. Pravilnik o unutrašnjoj organizaciji Uprave policije u okviru K MUP	Nakon usvajanja na nivou F BiH
2. Uredba o postupku u slučaju viška policijskih službenika (Nacrt)	Po završetku rada Stručne komisije
3. Uredba o plaćama i naknadama policijskih službenika (Nacrt)	Po završetku rada Stručnog tima
ANALITIČKO-INFORMATIVNI DIO	
1. Izvještaj o radu K MUP za 2007.godinu	Februar
2. Informacija o stanju sigurnosti na području Unsko-sanskog kantona za 2007.godinu	Mart
3. Informacija o stanju sigurnosti na području USK-a za period januar-juni 2008	Septembar
4. Informacija o stanju sigurnosti saobraćaja na području USK-a za period januar-juni 2008.	Juli
5. Prijedlog Budžeta Uprave policije kao samostalne jedinice u okviru budžeta KMUP USK	Decembar 2007.
6. Informacija o stanju sigurnosti saobraćaja na području USK za period januar-jun za 2007.	Septembar
7. Program rada K MUP za 2009.godinu	Decembar

5. KANTONALNO MINISTARSTVO PRIVREDE

O P I S	R O K
NORMATIVNI DIO	
I ZAKONI	
1. Zakon o koncesijama	Februar
2. Zakon o rudarstvu	Po donošenju zakona na federalnom nivou
3. Zakon o geološkim istraživanjima	Po donošenju zakona na federalnom nivou
4. Zakon o izmjenama i dopunama Zakona o obavljanju javnog prijevoza lica i stvari u cestovnom prometu.	Po donošenju zakona na federalnom nivou
5. Zakon o izmjenama i dopunama Zakona o obrtu	Po donošenju na federalnom nivou
6. Zakon o upravljanju imovinom Unsko-sanskog kantona	Mart
II PODZAKONSKI AKTI	
ANALITIČKO-INFORMATIVNI DIO	
1. Izvještaj o radu ministarstva za 2007. godinu	Februar
2. Informacija o stanju u «Agrokomerc» dd Velika Kladuša sa prijedlogom mjera	Februar
3. Informacija o stanju u privrednim društvima sa ostvarenim rezultatima poslovanja iz oblasti trgovine, turizma i saobraćaja za 2007.godinu	April
4. Informacija o stanju u privrednim društvima sa ostvarenim rezultatima poslovanja u oblasti industrije, energetike i rudarstva za 2007.godinu	April
5. Program rada ministarstva za 2009.godinu	Decembar

6. KANTONALNO MINISTARSTVO POLJOPRIVREDE, VODOPRIVREDE I ŠUMARSTVA

O P I S	R O K
NORMATIVNI DIO	
I ZAKONI	
1. Zakon o novčanim poticajima u primarnoj poljoprivrednoj proizvodnji	Prijedlog: april
2. Zakon o vodama Unsko-sanskog kantona	-nacrt:oktobar
II PODZAKONSKI AKTI	
1. Prijedlog Odluke i Uputstva o poticajima u primarnoj poljoprivrednoj proizvodnji za 2008.	Nakon donošenja Budžeta za 2008.

ANALITIČKO-INFORMATIVNI DIO	
1. Izvještaj o utrošku sredstava u 2007.god., grant: Veterinarstvo – zdravstvena zaštita životinja	Februar
2. Informacija o stanju i kretanju zaraznih bolesti životinja na području USK-a u 2007.godini	Februar
3. Izvještaj o realizaciji Programa utroška sredstava od vodnih naknada u 2007.godini	Februar
4. Izvještaj o utrošku sredstava (2%) po Zakonu o šumama	Februar
5. Izvještaj o realizaciji kantonalnih i federalnih poticaja u primarnoj poljoprivrednoj proizvodnji u 2007.godini (Vlada i Skupština)	Mart
6. Plan rada i poslovanja ŠPD „Unsko – sanske šume“ d.o.o. Bosanska Krupa za 2008.godinu	Mart
7. Izvještaj o korištenju sredstava ostvarenih od naknade za pretvorbu poljoprivrednog zemljišta u građevinsko u 2007.godini	Mart
8. Prijedlog Programa korištenja sredstava od naknade za pretvorbu poljoprivrednog zemljišta u građevinsko (program rekultivacije) za 2008.godinu	Nakon donošenja Budžeta za 2008.
9. Plan i Finansijski plana u sektoru voda na području Unsko – sanskog kantona za 2007.	Mart
10. Informacija o planiranim sjetvenim površinama za proljetnu sjetvu 2008.godine	Mart
11. Izvještaj o radu ministarstva poljoprivrede, vodoprivrede i šumarstva za 2007.godinu	April
12. Izvještaj o radu i poslovanju ŠPD „ Unsko – sanske šume“ d.o.o. Bosanska Krupa za 2007.	April
13. Informacija o obavljenoj žetvi na Unsko – sanskom kantonu za 2008.godinu	August
14. Informacija o planiranim sjetvenim površinama za jesenju sjetvu 2008.godine	Septembar/Oktobar
15. Program mjera zdravstvene zaštite životinja za 2008.godinu	Nakon donošenja za područje BiH
16. Program rada ministarstva za 2009.godinu	Decembar

7. KANTONALNO MINISTARSTVO ZDRAVSTVA, RADA I SOCIJALNE POLITIKE

O P I S	ROK
NORMATIVNI DIO	
I ZAKONI	
1. Zakon o izmjenama i dopunama Zakona o socijalnoj zaštiti, zaštiti civilnih žrtava rata i zaštite porodice sa djecom	Mart
II PODZAKONSKI AKTI	
1. Odluka o izmjenama i dopunama Odluke o neposrednom učešću osiguranih lica u troškovima korištenja zdravstvene zaštite na području Unsko-sanskog kantona	Februar
2. Uputstvo o visini sredstava za alternativni/nužni smještaj za 2008. godinu u skladu sa Zakonom o izbjeglikim i raseljenim osobama „Sl. novine F BiH“ br.15/05	Februar.
3. Prijedlog Odluke o osnovicama i stopama doprinosa za obavezno zdravstveno osiguranje	Mart
4. Mreža primarne zdravstvene zaštite na području USK-a	April

5. Pravilnik o izmjenama i dopunama Pravilnika o unutrašnjoj organizaciji i sistematizaciji radnih mjesta Kantonalnog ministarstva zdravstva i socijalne politike	Prema potrebi
ANALITIČKO-INFORMATIVNI DIO	
1. Program rada Zavoda za javno zdravstvo Unsko-sanskog kantona za 2008. godinu	Februar
2. Program rada Službe za zapošljavanje Unsko-sanskog kantona za 2008. godinu	Februar
3. Izvještaj o radu i poslovanju JU Socijalno-pedagoške životne zajednice u 2007. godinu	Februar
4. Izvještaj o radu i poslovanju Zavoda za javno zdravstvo Unsko-sanskog kantona za 2007. godinu	Februar
5. Izvještaj o utrošku sredstva za poticaj zapošljavanja za 2007. godinu	Februar
6. Program rada Zavoda zdravstvenog osiguranja Unsko-sanskog kantona za 2008. godinu	Februar
7. Izvještaj o radu i poslovanju JU Službe za zapošljavanje Unsko-sanskog kantona za 2007. godinu	Mart
8. Izvještaj o radu i poslovanju domova zdravlja Unsko-sanskog kantona za 2007. godinu	Mart
9. Izvještaj o radu i poslovanju ZU Kantonalne bolnice „Dr Irfan Ljubijankić“ Bihać za 2007. godinu	Mart
10. Izvještaj o stanju u oblasti izbjeglih i raseljenih lica na području Unsko-sanskog kantona u 2007. godini	April
11. Izvještaj o stanju u oblasti socijalne zaštite na području Unsko-sanskog kantona u 2007. godini	April
12. Izvještaj o radu i poslovanju Zavoda zdravstvenog osiguranja Unsko-sanskog kantona za 2007. godinu	April
13. Strategija razvoja zdravstva na području Unsko-sanskog kantona do 2010. godine	April
14. Strategija za povećanje zaposlenosti na Unsko – sanskom kantonu u 2008. godini	April
15. Financijski plan Zavoda zdravstvenog osiguranja Unsko-sanskog kantona za 2009. godinu	Novembar
16. Financijski plan JU Službe za zapošljavanje Unsko-sanskog kantona za 2009. godinu	Novembar
17. Prijedlog rasporeda utroška sredstava za sve oblike novčanih beneficija utvrđenih Budžetom Unsko-sanskog kantona za 2008. godinu	60 dana po usvajanju Budžeta
18. Izvještaji o utrošku novčanih sredstava po osnovu Odluka o usvajanju Programa utroška sredstava iz Budžeta Unsko-sanskog kantona za 2008. godinu	30 dana po utrošku kvartalno-godišnje
19. Izvještaj o završetku radova i početku rada JU Opća bolnica u Sanskom Mostu	60 dana od početka rada ustanove

8. KANTONALNO MINISTARSTVO ZA PITANJA BORACA I RVI

OPIS	ROK
NORMATIVNI DIO	
I ZAKONI	
1. Zakon o izmjenama i dopunama Zakona o dopunskim pravima branilaca i članova njihovih porodica	-prijedlog: juni
II PODZAKONSKI AKTI	
1. Pravilnik o kriterijima za dodjelu stipendija za redovne studente iz reda pripadnika boračkih kategorija	Februar
2. Izmjene i dopune Pravilnika o kriterijima i postupku za odobravanje jednokratne pomoći članovima boračkih populacija	Mart-april

ANALITIČKO-INFORMATIVNI DIO	
1. Izvještaj o radu Kantonalnog fonda za izgradnju stanova za članove porodica šehida, RVI, demobilisane borce i prognane osobe za 2007.godinu	Februar-mart
2. Plan i Program rada Kantonalnog fonda za izgradnju stanova za članove porodica šehida i prognane osobe za 2008.godinu	Februar -mart
3. Izvještaj o radu ministarstva za 2007.godinu	Februar
4. Izvještaj o utrošenim sredstvima ministarstva za 2007.godinu	Februar-mart
5. Izvještaj o finansijskim sredstvima utrošenim za tri, šest i devet mjeseci 2008.godine	Tromjesečno
6. Informacija o izvršenju programa rada ministarstva za šest mjeseci tekuće godine	Juli-septembar
7. Program rada ministarstva za 2009.godinu	Decembar

9. KANTONALNO MINISTARSTVO ZA GRAĐENJE, PROSTORNO UREĐENJE I ZAŠTITU OKOLINE

O P I S	ROK
NORMATIVNI DIO	
I ZAKONI	
1. Zakon o prostornom uređenju i građenju	Nacrt :maj Prijedlog: jul
II PODZAKONSKI AKTI	
1. Odluka o redosljedu prioriteta za dodjelu stanova privatiziranih preduzeća	April
ANALITIČKO-INFORMATIVNI DIO	
1. Izvještaj o radu ministarstva za 2007.godinu	Februar
2. Informacija o stanju u oblasti prostorno-planske dokumentacije u općinama Unsko-sanskog kantona	Maj
3. Kantonalni plan za upravljanje otpadom	Novembar.
4. Kantonalni plan zaštite okoliša	Novembar.
5. Informacija o bespravnoj gradnji na području Unsko – sanskog kantona	Decembar.
6. Program rada ministarstva za 2009.godinu	Decembar

KANTONALNE UPRAVE I USTANOVE

1. KANTONALNA UPRAVA ZA INSPEKCIJSKE POSLOVE

O P I S	ROK
PODZAKONSKI AKTI	
1. Uredba o naknadama i drugim materijalnim pravima koje nemaju karakter plaće zaposlenih u Kantonalnoj upravi za inspeksijske poslove	Februar
ANALITIČKO-INFORMATIVNI DIO	
1. Izvještaj o radu Uprave za 2007.godinu	Februar
2. Program rada Uprave za 2009.godinu	Decembar

2. KANTONALNA UPRAVA CIVILNE ZAŠTITE

O P I S	ROK
PODZAKONSKI AKTI	
1. Uredba o formiranju mješovite kantonalne specilizirane jedinice civilne zaštite za hitne intervencije	April
2. Izmjena i dopuna Uredbe o Kantonalnom štabu civilne zaštite	Maj
ANALITIČKO-INFORMATIVNI DIO	
1. Izvještaj o radu Kantonalne uprave civilne zaštite za 2007.godinu	Februar
2. Plan rada «B» Tima za deminiranje FUCZ-e na području Unsko – sanskog kantona za 2009.g.	Novembar
3. Program rada KUCZ-e za 2009.godinu	Decembar

3. POLJOPRIVREDNI ZAVOD

OPIS	ROK
PODZAKONSKI AKTI	
ANALITIČKO-INFORMATIVNI DIO	
1. Izvještaj o radu Zavoda za 2008. godinu	Februar
2. Program rada Zavoda za 2009. godinu	Decembar

4. KANTONALNA DIREKCIJA ZA CESTE

OPIS	ROK
PODZAKONSKI AKTI	
ANALITIČKO-INFORMATIVNI DIO	
1. Plan i program rada Kantonalne direkcije za ceste za 2008.godinu	Februar
2. Izvještaj o radu Kantonalne direkcije za ceste za 2007.godinu	Februar
3. Plan i Program rada Kantonalne direkcije za ceste za 2009.godinu	Decembar

Program Vlade Unsko-sanskog kantona za 2008. godinu objavit će se u “Službenom glasniku Unsko - sanskog kantona”.

Broj: 03-017-468/2008
Bihać, 14.02.2008.godine

PREMIJER KANTONA
Šemsudin Dedić